




明紀卷第十三

賜進士部候補事虞衡行陳鶴齡歸贈府銜繪驕尉藏國庫中景男家器

英宗紀

一起正統元年丙辰訖正統八年癸亥凡八年



英宗法天立道仁明誠敬昭文憲武至德廣者曆皇帝正統元年春正月丙戌罷銅仁金場 庚寅發禁軍二萬屯田畿輔

三月乙亥御經筵以張輔等知經筵事少詹事王直等兼經筵官初經筵無定日亦無定所至是始著為常儀以月之二日十

二日二十二日御文華殿進講寒暑暫免日講御文華穿殿侍讀苗衷侍講高毅修撰馬愉曹鼐侍講讀 夏四月丁酉朔享

太廟 五月丁卯阿台朵兒只伯寇肅州 壬辰設提督學校官南北直隸俱御史各省參用按察司副使僉事其所轄太廣

明紀卷十三

一

歲巡不能及者口外及各都司衛所土官以屬分巡道員盧鳳淮揚滁徐和屬江北巡按衡永郴屬湖南道辰靖屬辰沅道瓊州屬海南道甘肅衛所屬巡按御史 都察院考察御史不稱

者十五人降黜之邵宗與焉宗九載滿吏部已考稱郭璉言宗不應與在任者同考帝以責顧佐會御史張鵬等劾宗帝遂責

佐及鵬等朋欺佐上章致仕去 宣德末古里蘇門答刺等十一國貢使久留京師未遣閏六月命與瓜哇使臣同行救瓜哇

國王加意撫卹分遣還國 秋七月詔舉廷臣堪為郡守者擢刑部員外郎程溥福為南康知府 令有司訪求南宋衍聖公

孔端友及宋儒周敦頤程顥程頤司馬光朱熹後裔蠲其徭役聰明俊秀可教養者送所在儒學讀書其祠墓傾圮者修之

時百官月俸皆持帖赴領南京米賤時俸帖七八石僅易銀一兩而定例歲賦不徵金銀惟坑冶課有之入內承運庫若歲賦偶有折收則送南京供武臣祿而各邊有緩急亦取足其中八月副都御史周銓請於南畿浙江江西湖廣不通舟楫地折收布絹白金解京充俸趙新黃福亦以爲言帝以問胡濙濙對以太祖嘗折納稅糧於陝西浙江民以爲便於是始令米麥一石折銀二錢五分謂之金花銀周忱因請檢重額官田極貧下戶兩稅準折納銀其後概行於天下自南直隸之蘇松常徽及浙江江西湖廣福建廣東廣西米麥共四百餘萬石折銀百萬餘兩並解京入內承運庫以爲永制 阿台朵兒只伯屢寇甘涼邊將告急甲戌右都督蔣貴佩平虜將軍印充總兵官都督同

明紀卷十三

二

知趙安爲副帥師討之 詔還解縉家產 九月癸卯遣侍郎何文淵王佐副都御史朱與言提督兩淮長蘆兩浙鹽課命中官御史同往未幾以鹽法已清召還其後歲遣御史巡鹽自此始 黎麟再入貢帝以陳氏宗支旣絕欲使麟正位下廷議咸以爲宜庚申命兵部侍郎李郁左通政柰亨齎敕印封麟爲安南國王 冬十一月乙卯詔京官三品以上舉堪任御史者四品及侍從言官舉堪任知縣者各一人 免湖廣被災稅糧 王振欲市權令朝臣畏己導帝用重典御下防大臣欺蔽會兵部尚書王驥議邊事五日未奏十二月丁丑帝召驥面責之曰卿等欺朕幼冲耶遂執驥及右侍郎鄭埜下獄頃之得釋右都御史陳智劾張輔回奏稽延并劾科道不舉奏帝釋輔不問杖

御史給事中各二十自是言官承振風旨屢撫大臣過失自公侯駙馬伯及尙書都御史無不被劾下獄荷校譴謫無虛歲

廣西蒙願十六洞蠻與湖廣逃民相聚蜂起肅授督兵圍之再戰悉禽斬其酋餘黨就誅乙酉賊平授上言靖州與廣西接壤時苦苗患永樂宣德間嘗儲糧數萬石備軍興比年所儲少有警發人徒轉輸賊輒先覺以故不能得賊乞於清浪靖州二衛各增儲五萬石庶緩急可藉報可 阿台犯莊浪都指揮江源戰死亡士卒百四十餘人侍郎徐晞劾蔣貴朝議以貴方選軍甘州勢不相及而莊浪乃晞所統責晞委罪置貴不問時朝議將大出兵擊阿台等巡撫宣大僉都御史李儀言四裔爲患自古有之在備禦有方耳和寧殘部窮無所歸乍臣乍叛小爲邊

明紀卷十三

三

寇邊將謹待之將自遁何必窮兵不納時先朝宿將已盡開平千戶楊洪以敢戰著名爲人機變敏捷善出奇搗虛未嘗小挫王驥言其能詔加游擊將軍洪所部纔五百選開平獨石騎兵益之再進都指揮僉事 成國公朱勇言近瓦剌脫懽以兵迫逐韃靼朵兒只伯恐吞併之日益强大乞勅各邊廣積儲以備不虞帝嘉納之勇能之子也未幾脫懽殺賢義安樂二王併其眾欲自稱可汗焮不可乃共立脫脫不花以先所併阿魯台之眾歸之自爲丞相居漠北哈喇噶等部俱屬焉

二年春正月甲午宣宗神主祔太廟 太皇太后御便殿帝西向立召張輔楊士奇楊榮楊溥胡濙入見諭曰卿等老成嗣君幼幸同心共安社稷又召溥前曰仁宗皇帝念卿忠屢加歎息

不意今尙見卿溥感泣太皇太后亦泣左右皆悲愴太皇太后顧帝曰此五臣三朝簡任俾輔後人皇帝萬幾宜與五臣共計已召王振至數其罪欲誅之帝跪爲請輔等亦跪太皇太后曰皇帝年幼豈知此輩自古誤人家國今後慎勿令干國事也

謀報阿台等駐賀蘭山後已亥詔大同總兵官方政偕楊洪出大同迤西蔣貴偕趙安出涼州塞會勤以羅亨信參貴軍事

大同督糧參政劉璉不職李儀劾之璉乃誣儀淫亂事會參將石亨欲奏鎮守中官郭敬罪先咨儀儀誤封緘咨牒於核饗主事文卷中戶部以聞亨敬遂互相奏訐詔儀璉自陳而切責敬等儀自負其直詞頗激二月被劾下獄瘐死邊人素德儀建昭德祠以祀 三月甲午錄囚 戊午御史金敬撫輯大名及河

明紀卷十三

四

南陝西逃民 夏四月免河南被災田糧 蔣貴之出塞也至魚兒海子都指揮安敬言前途無水草芻饟不繼留十日引還羅亨信讓之曰公等受國厚恩敢臨敵退縮耶死法孰與死敵貴等不從亨信上章言貴逗遛狀五月庚寅王驥經理甘肅邊務密旨戮敬許便宜行事驥疾驅至軍大會諸將問魚兒海子先退敗軍者誰僉曰敬遂縛敬斬轅門并宣敕責貴諸將皆股栗驥乃大閱將士分兵書地使各自防禦邊境肅然 壬寅刑部尙書魏源整飭大同宣府諸邊許便宜行事源遣都督僉事李謙守獨石楊洪副之萬全衛指揮杜衡部卒李全皆訐奏洪罪帝從源言謫衡戍廣西執全付洪自治 丁未免陝西平涼六府旱災官稅 陳鑑巡延綏寧夏邊所至條奏軍民便宜多

所廢置所部六府饑請發倉振之 王驥既出督軍鄺埜獨任
部事時邊陲多警將帥乏人埜請令中外博舉謀略材武士以
備任使 六月乙亥以宋儒胡安國蔡沈真德秀從祀孔子廟
廷 江北河南大水民饑庚辰副都御史賈諒侍郎鄭辰振之
芒碭山盜爲患諒捕獲甚眾秋九月河決陽武原武滎澤命辰
俟便修塞 郭璉雖長六卿然望輕政歸內閣自布政司至御
史知縣皆令京官保舉左通政陳恭言古者擇任庶官悉由選
部責任專而事體一今令朝臣各舉所知恐開私謁之門長奔
競之風乞杜絕令歸一下吏部議璉遜謝不敢當事遂寢 李
謙老而怯故與楊洪左洪每調軍謙輒陰沮之洪嘗勵將士殺
敵謙笑曰敵可盡乎徒殺吾人耳御史張鵬劾罷謙因命洪代
洪連敗兀良哈兵賜敕嘉獎又敕宣天總兵官譚廣曰此卽前
寇延綏爲指揮王禎所敗者去若軍甚邇顧不能撲滅若視洪
等媿否 阿台復入寇冬十月甲子鎮守甘肅左副總兵任禮
爲平羌將軍充總兵官蔣貴趙安爲左右副總兵柴車及僉都
御史曹翼羅亨信參贊軍務王驥及太監王貴監督討阿台朵
兒只伯 十一月乙巳振河南饑免稅糧 初朵兒只伯寇涼
州副總兵劉廣喪師不以實聞顧飾功邀賞柴車劾其罪械廣
詣京岷州土官后能冒功得陞賞車奏請加罪能復請命帝宥
之車反覆論其不可曰詐冒如能者實繁有徒臣方次第按覈
今宥能何以戢眾若無功得官則捐軀死敵者何以待之朝廷
雖從能請然嘉車之直遣使勞賜之 山雲上言潯州與大藤

諸山相錯猺寇不時出沒占耕旁近荒田而左右兩江土官所屬人多田少其狼兵素勇爲賊所畏請量撥田州土兵於近山屯種分界耕守委土官都指揮黃竑領之斷賊出入不過數年賊必坐困報可 南甸土知州刀貢罕奏麓川思任發奪其所轄羅卜思莊二百七十八村乞遣使齎金牌信符諭之退還敕沐晟處置任發倫發之子也

三年春楊洪擊寇於伯顏山馬蹶傷足戰益力禽其部長也陵台等四人追至寶昌州又禽阿台答刺花等五人璽書慰勞遣醫視 魏源奏譚廣老帝命黃真楊洪充左右參將協鎮諸將肅然源按行天城朔州諸險要令將吏分守設威遠衛增修開平龍門城自獨石抵潮河川增置墩臺六十免屯軍租一年儲

明紀卷十三

六

火器爲邊備諸依權貴避役者悉括歸伍 三月己亥京師地

震庚子又震 辛丑振陝西饑 甲辰京師地又震者再 王

驥偕諸將出塞以蔣貴爲前鋒而自與任禮帥大軍後繼敗朵兒只伯於狼山追抵石城間朵兒只伯依阿台於兀魯乃使貴帥輕騎二千五百人往襲之約曰不捷無相見也副將李安沮貴貴拔劍厲聲叱安曰敢阻軍者死遂出鎮夷間道疾馳抵其巢阿台方牧貴猝入馬羣令士卒以鞭擊弓韉驚馬馬盡佚敵失馬挽強步鬪貴縱騎蹂擊指揮毛哈喇奮入其陳大敗之復分軍爲兩翼別遣百騎乘高爲疑兵轉戰八十里驥與禮自梧桐林至亦集乃禽樞密同知僉院十五人萬戶二人降其部落窮追至黑泉趙安等出昌寧至刁力溝禽右丞達魯花赤三十

入分道夾擊轉戰千餘里阿台與朵兒只伯以數騎遠遁夏四月乙卯驥以捷聞論功封貴定西伯禮寧遠伯安會川伯餘陞賞有差 癸未巡撫大同都御史盧睿請立馬市令軍民悉得平價市駝馬達官指揮李原等通譯語禁市兵器銅鐵從之一魏源以宣大軍務久弛請召還盧睿而薦于謙爲鎮守參贊朝廷以謙方撫山西河南不聽言官劾源臨邊擅易置大臣帝以源有勞置不問尋與王驥並還理部事 柴車在邊章數十上悉中時病同事多不悅車持益堅嘗言漠北降人朝廷留之京師雖厚爵賞其心終異如長脫脫木兒昔隨其長來歸未幾叛去今乃復來安知他日不再叛宜徙江南離其黨類事下兵部請處之河間德州帝報可後降者悉以此令從事 廢烏羅府

明紀卷十三

七

以所領分屬銅仁思南諸府廢鎮遠入鎮遠府 六月癸酉以旱讞中外疑獄 思任發狡獪逾於父兄緬甸宣慰新斯加爲木邦所殺任發侵有其地遂欲盡復其故地累侵孟定灣甸南甸干崖騰衝潞江金齒沐晟言狀朝命選將乙亥都督方政僉事張榮同征南將軍晟右都督沐昂討之昂晟之弟也 淮揚災鹽課虧敕周忱巡視忱奏令蘇州諸府撥餘米一二萬石運揚州鹽場聽抵明年田租竈戶得納鹽給米時米貴鹽賤官得積鹽民得食米公私大濟尋敕忱兼理松江鹽課華亭上海二縣逋課至六十三萬餘引竈丁逃亡忱謂田賦宜養農夫鹽課宜養竈丁條上鑄鐵釜卹鹵丁選總催嚴私販四事命速行之忱爲節竈戶運耗得米三萬二千餘石做濟農倉法置贍鹽倉

益補逃亡缺額由是鹽課大殖 王振屢擢大臣小過諷給事中御史論劾秋七月戶部以軍官俸糧改於京倉支給禮部以失印刑部以決獄不當尙書劉中敷胡濙魏源侍郎吳璽何文淵等先後下獄尋俱釋之 八月乙亥以陝西饑令雜犯死囚以下輸銀贖罪送邊吏易米 九月癸巳蠲兩畿湖廣逋賦 冬十月癸丑再振陝西饑 時工役繁興匠多逃者先已逮至六千餘人十一月又逮四千二百餘人後又逮萬人皆令桎梏赴工 遼王貴烺居國多過湖廣巡撫侍郎吳政巡按御史陳祚等奏其不友諸弟待庶母寡恩捶死長史杜述召訊京師盡得其淫穢黷倫諸不法事以政等奏貴烺罪有所隱逮下獄已而三法司上貴烺罪狀亦不言其內亂事十二月丙辰盡下魏

明紀卷十三

八

源陳智等於獄超擢刑部郎中丁鉉主事張鳳爲左右侍郎 遼東總兵官巫凱有疾命醫馳視未至而卒凱性剛毅饒智略馭眾嚴而有恩在遼東三十餘年威惠並行邊務修飭前後守東陲者皆莫及 廣西總兵官山雲卒贈懷遠伯謚襄毅雲謀勇深沈而端潔不苟公賞罰嚴號令參佐有罪輒上請不妄殺人人亦不敢犯與士卒同甘苦臨機應變戰無不捷所至詢問里老撫善良察誣枉廣西人思雲不置立祠肖像祀焉 鑄銅渾天儀簡儀於北京 榜葛刺貢麒麟 孔顏孟三氏教授裴侃言闕里家廟宜正父子以敘彝倫顏子曾子子思子也配享殿廷無繇子皙伯魚父也從祀廊廡非惟名分不正抑恐神不自安况叔梁紇元已追封啟聖王創殿於大成殿西而顏孟父

俱封公乞追封子哲伯魚公爵循顏孟父俱配啟聖王殿帝命禮部行之 南京國子監祭酒陳敬宗言舊制諸生以在監久近送諸司歷事比來有因事予告者遷延累歲至撥送之期始赴實長奸憊請以肄業多寡爲次第又近有願就雜職之例士風卑陋誠非細故請加禁止從之 沐晟師次金齒思任發修貢冀緩師晟信之無渡江意任發乃遣眾萬餘奪潞江沿江造船三百艘欲取雲龍又殺甸順江東等處軍餘殆盡帝以賊勢日甚責晟等玩寇養患方政亦至軍欲出戰晟不可政造舟欲濟師晟又不許政不勝憤

四年春正月壬午獨帥麾下與賊將緬簡戰破賊舊大寨賊奔景罕指揮唐清復擊破之又追敗之高黎共山下共斬三千餘級乘勝深入逼任發上江上江賊重地也政遠攻疲甚求援於晟晟怒其違節制渡江不遣久之以少兵往至夾象石又不進政迫至空泥賊出象陳衝擊政力戰死之一軍皆沒 貴州計砂賊苗金蟲苗總牌糾洪江生苗作亂僞立統千侯統萬侯號二月丁巳蕭授督兵抵計砂分遣都指揮鄭通攻三洋洞馬畦攻黃柏山大破之副總兵吳亮窮追至蒲頭洪江斬總牌千戶尹勝誘斬金蟲於是生苗盡降 楊士奇乞致仕不允乞歸省墓許之未幾還士奇道南京聞黃福疾往視之福驚曰公輔幼主一日不可去左右奈何遠出土奇深服其言福在南京嘗坐李隆側土奇寄聲曰豈有孤卿而旁坐者福曰焉有少保而贊守備者耶卒不變然隆待福甚恭公退卽推福上坐福亦不辭

閏月辛丑釋魏源陳智等復其官并宥棄交阯王通馬麒麟
及弋謙等皆爲民吳政等亦遇赦得免 三月己酉詔赦天下
庚申廢遼王貴烺爲庶人守簡王園進封興山王貴煖爲遼
王 沐晟聞方政敗請益軍帝遣使者責狀仍調湖廣貴州四
川官軍五萬人令吳亮馬翔統之至雲南聽晟節制并敕晟豫
籌糧糈晟慚懼發病丁卯還至楚雄卒贈定遠王諡忠敬晟席
父兄業滇人懾其威信莊事如朝廷片楮下土酋具威儀出郭
迎盛而後啟曰此令旨也晟用兵非所長戰數不利善事朝貴
賂遺不絕以故得中外聲 癸酉增南京及在外文武官軍俸
廩 夏五月庚戌右都督沐昂爲征南將軍充總兵官討思任
發 丁卯錄中外囚 倭船四十艘連破台州桃渚寧波大嵩

明紀卷十三

十

二千戶所又陷昌國衛大肆殺掠 京師大水壞官舍民居三

千三百九十區順天真定保定三府州縣俱大水

六月乙未京師地震 丁酉以京畿水災祭告天地諭羣臣修

省戊戌下詔寬卹求直言 時王振用事法務嚴峻陳祚言乃

者法司論獄多違定律務刻深如戶部侍郎吳璽誤舉淫行

主事吳軌宜坐貢舉非其人律乃加以奏事有規避律斬及軌

自經死獄官獄卒罪應遞減乃援不應爲重罪概杖之一事如

此餘可推矣天時不順災沴數見未必非此夫原情以定律祖

宗防範至周而乃抑輕從重至此非所以廣聖朝之仁厚也今

後有妄援重律者請以變亂成法罪之帝是之以其章示法司

編修劉定之應詔陳十事言號令宜出大公裁以至正不可

苟且數易公卿侍從當數召見察其才能心術而進退之降人散處京畿者宜漸移之南方郡縣職以京朝官補使迭相出入內外無畸重薦舉之法不當拘五品以上可做唐制朝臣遷秩舉一人自代吏部籍其名而簡用之武臣子孫教以韜略守令牧養爲先毋徒取幹辦羣臣遭喪乞永罷起復以教孝僧尼蠹國當嚴絕富民輸粟授官者有犯宜追奪疏入留中 召蕭授遠以老致仕自顧成沒羣蠻所在屯結官軍討之皆無功授沈毅多計算裨校皆盡其才寇起輒滅威信大行尋起視事右府秋七月庚戌免兩畿山東江西河南被災稅糧 壬申汰冗官 八月戊戌增設沿海備倭官 己亥地震 初思恩知州岑瑛有謀略善治兵以從征蠻寇功加田州知府銜仍掌州事

明紀卷十三

十一

遂與現任知府岑紹交惡各具奏下總兵官安遠侯柳溥等議冬十月溥等請升思恩爲府俾瑛紹各守疆土以杜侵奪從之松潘都指揮趙諒誘執祈命簇國師商巴掠其財與同官趙得誣以叛其弟小商巴怒聚眾浦江新塘等關據險剽掠十二月丁丑都督同知李安充總兵官僉都御史王朝參贊軍務討之 瓦剌脫歡死子也先嗣稱太師准王諸部皆下之脫脫不花具空名而已脫脫不花歲來朝貢帝報之比諸番有加書稱之曰達達可汗及是主臣並使朝廷亦兩敕答之賜賚甚厚朱勇以瓦剌漸強請塞紫荆關諸隘口增守備從之

五年春正月南京戶部尚書黃福卒福丰儀修整不妄言笑歷事六朝多所建白公正廉恕素孚於人當官不爲赫赫名事微

細無不謹憂國忘家老而彌篤自奉儉約妻子僅給衣食所得俸祿惟待賓客周匱乏而已其卒也贈諡不及士論惜之 王振一日語楊士奇等曰朝廷事久勞公等公等皆高年倦矣當若何士奇曰老臣盡瘁報國死而後已楊榮曰不然吾輩衰殘無以效力當擇後生可任者報聖恩耳振喜而退士奇咎榮失言榮曰彼厭吾輩矣一旦內中出片紙令某人入閣且奈何及此時進一二賢者同心協力尚可爲也士奇以爲然翼日列侍讀學士苗衷等名以進二月乙亥侍講學士馬愉侍講曹鼐入閣預機務 時禮部侍郎王直以次當入閣士奇不欲乃令直出泣部事直在翰林二十餘年稽古代言編纂記注之事多出其手與王英齊名人稱二王以居地目直曰東王英曰西王

明紀卷十三

三

甲申僉都御史張純大理少卿李畛振撫畿內流民 楊榮乞歸展墓命中官護行靖江王佐敬私饋榮金榮已行之知王振欲借以傾榮楊士奇力解之得已 初奉天華蓋謹身三殿災以奉天門爲正朝三月戊申重建三殿並修繕乾清坤寧二宮役工匠官軍七萬人 夏四月壬申免山西通賦 王翱等旣行巡按御史白商巴枉詔審機進止翱至盡得趙諒誣陷狀乃出商巴於獄遣人招其弟丙戌祈命簇番降翱撫定餘黨劾諒誅之成趙得復商巴國師松潘遂平 沐昂抵金齒畏賊甚遷延者久之賊款軍門約降主事楊寧曰兵未加而先降誘我也宜嚴兵待之不聽五月參將張榮前驅至芒市賊大至官兵敗績昂不救引還貶昂二級逮吳亮等下獄貶官已思任發入

寇昂擊卻之 六月丁丑免兩畿被災田糧 戊寅錄囚 秋

七月辛丑遣刑部侍郎何文淵等分行天下修備荒之政從楊士奇請也時詔兼徵民逋給事中廖莊請寬災傷州縣俟秋成從之 楊榮還朝至武林驛壬寅卒贈太師諡文敏榮論事激發不能容人過然遇人觸帝怒致不測往往以微言導帝意得解夏原吉李時勉之不死頗賴其力嘗語人曰事君有體進諫有方以悻直取禍吾不爲也故恩遇亦始終無間時人以方姚崇 八月乙未令各邊修舉荒政從陳鑑請也由是塞上咸有儲蓄 九月壬寅蠲雲南逋賦 冬十一月壬寅振浙江饑

壬子免蘇松常鎮嘉湖水災稅糧 有僧年九十餘由雲南至

廣西自稱建文帝命其徒詣思恩知府岑瑛執送總兵官柳溥

明紀卷十三

三

丁巳械至京師會官鞫之乃河南鈞州人楊行祥洪武中度爲僧歷遊兩京雲南貴州至此帝令錦衣衛錮之踰四月死從者十二人皆戍邊 乙未沐昂討平師宗叛蠻 十二月壬午免南畿浙江山東河南被災稅糧 軒輓爲浙江按察使前使奢汰輓力矯之寒暑一青布袍補綴殆遍居常蔬食妻子親操井臼與僚屬約三日出俸錢市肉不得過一斤僚屬多不能堪故舊至食惟一豆或具雜黍則人驚以爲異 思任發兵愈橫犯景東剽孟定殺大侯知州刀奉漢等千餘人破孟賴諸寨降孟璉諸長官司乃遣人以象馬金銀修貢復致書雲南總兵官白己不反帝降敕許赦其罪已而沐昂條上攻取策王振方用事喜功名思大舉召蔣貴於甘肅以任禮代之王驥亦欲自效何

文淵疏諫曰麓川徼外彈丸地不足煩大兵若遣雲南守將屯金齒令三司官撫諭之遠人得更生而朝廷免調兵轉饟策之善者也帝下廷臣議驥及張輔等皆以爲麓川負恩怙惡在所必誅如思任發早自悔禍縛詣軍門生全之恩取自上裁帝然之封張昇爲惠安伯世襲

六年春正月己亥朔日當食不見禮官請表賀不許乙卯以莊浪地屢震躬祀郊廟遣使祭四方嶽鎮侍講劉球上疏曰帝王之馭四裔必有其小而防其大所以適緩急之宜爲天下久安計也周伐崇不克退修德教以待其降至於獯狁則命南仲城朔方以備之漢征南越不利卽罷兵賜書通好至於匈奴雖已和親猶募民徙居塞下入粟賞邊復命魏尚守雲中拒之

明紀卷十三

古

今麓川殘寇思任發素本羈屬以邊將失馭致勤大兵雖渠寇未殲亦多戮羣醜爲誅爲舍無繫輕重聖書原其罪覺使自新甚盛德也邊將不達聖意復議大舉欲屯十二萬衆於雲南以趣其降不降則攻之不慮王師不可輕出蠻性不可驟馴地險不可用衆客兵不可久淹况南方水旱相仍軍民交困若復動衆紛擾爲憂臣竊謂宜緩天誅如周漢之於崇越也至於瓦剌終爲邊患及其未卽騷動正宜以時豫防迺欲移甘肅守將以事南征卒然有警何以爲禦臣竊以爲宜慎防邊如周漢之於獯狁匈奴也伏望陛下罷大舉之議推選智謀將帥輔以才識大臣量調官軍分屯金齒諸要害結木邦諸蠻以爲援乘間進攻因便撫諭寇自可服至於西北障塞當救邊臣巡視濬築溝

垣增繕城堡勤訓練嚴守望以防不虞有備無患之道也章下
兵部謂南征已有成命不用球言 蔣賁爲平蠻將軍都督同
知李安僉事劉成副之王驥總督軍務大會諸道兵十五萬討
思任發瀕行賜騶貴金堯牟細鎧蟒繡緋衣朱弓矢又從驢請
得便宜從事 于謙爲巡撫十二年威惠流行太行伏盜皆避
匿嘗疏言今河南山西積穀各數百萬請以每歲三月令府州
縣報缺食下戶墮分支給俟秋成償官而免其老疾及貧不能
償者詔行之河南近河處時有衝決謙令厚築隄障計里置亭
亭有長責以督率修繕並令種樹鑿井道無渴者大同孤懸塞
外按山西者不及至奏別設御史治之盡奪鎮將私墾田以爲
邊用每議事京師無私謁王振銜之會謙入朝薦參政王來孫

原貞自代通政李錫阿振指劾謙以久不遷怨望無人臣禮三
月庚子下法司論死 夏四月甲午以災異頻見敕遣三法司
官詳審天下疑獄於是御史張驥刑部郎中林厚大理寺正李
從智等十三人同奉敕往五月甲寅何文淵及大理寺卿王文
錄在京刑獄周忱及刑科給事中郭瑾錄南京刑獄亦賜之敕
與中官興安等同事中官得與三法司刑獄自此始 釋于謙
爲大理寺少卿山西河南吏民伏闕上書請留謙者以千數周
晉諸王亦言之乃復命謙巡撫 御史曹泰言連歲災異咎在
廷臣請敕御史給事中糾彈大臣去其尤不職者而後所司各
考覈其屬帝命科道官參議於是郭瑾吳中侍郎李庸等被劾
者二十八人璉等自陳帝切責而宥之泰後復姓陳 評事馬豫

言臣奉敕審刑竊見各處所獲強盜多因讐人指攀拷掠成獄不待詳報死傷者甚多今後宜勿聽妄指果有贓證御史按察司會審方許論決若未審錄有傷死者毋得準例陞賞是年出死囚以下無數 兵部尙書柴車卒車在邊塞時同事者多以宴樂爲豪舉車惡之遂斷酒肉其介特多此類 秋七月丁未振浙江湖廣饑 初薛瑄爲山東提學僉事首揭白鹿洞學規開示學者延見諸生親爲講授才者樂其寬而不才者憚其嚴皆呼爲薛夫子王振語楊士奇楊溥吾鄉誰可爲京卿者語以瑄八月召爲大理寺左少卿士奇溥以用瑄出振意欲瑄一往見李賢語之瑄正色曰拜爵公朝謝恩私室吾不爲也其後議事東閣公卿見振多趨拜瑄獨屹立振趨揖之亦無加禮振由

明紀卷十三

夫

是街瑄 戶部請以供御牛馬分牧民間言官劾其變亂成法冬十月丁丑下劉中敷吳璽及右侍郎陳璫獄論斬詔柳長安門外閤十六日釋遣職 庚寅免畿內被焚稅糧 況鍾秩滿當遷部民二萬餘人走訴巡按御史張文昌乞鍾再任時趙豫莫愚陳本深俱爲部民乞留周忱等以聞詔皆進三品俸仍視府事 周忱既久任江南與吏民相習若家人父子每行村落屏去騶從與農夫餉婦相對從容問所疾苦爲之商略處置其馭下也雖卑官冗吏悉開心訪納遇長吏有能如況鍾趙泰輩則推心與咨書務盡其長故事無不舉嘗詣松江相視水利見嘉定上海間沿江生茂 多淤流乃濬其上流使崑山顧浦諸所水迅流駛下壅遂盡 暇時以匹馬往來江上見者不知其

爲巡撫也三殿重建詔徵牛膠萬斤爲綵繪用忱適赴京言庫貯牛皮歲久朽腐請出煎膠俟歸市皮償庫許之 封沈清爲修武伯 十一月甲午朔乾清坤寧二宮奉天華蓋護身三殿成大赦定都北京文武諸司不稱行在於南京官仍加南京字山西左參政王來居官廉練達政事然執法嚴疾惡尤甚以公事杖死縣令不職者十人逮下獄當徒遇赦以原官調補廣東 王驥馳傳至雲南思任發遣人乞降驥受之密令諸將分道入沐昂主饋運右參將冉保由東路攻細甸灣甸水寨入鎮康趨孟定左參將宮聚自下江投夾象石郎中侯璉援大侯州驥與蔣貴以二萬人由中路趨上江圍其寨賊拒守嚴銃弩飛石交下如雨五日不能拔癸卯天大風驥縱火焚柵官軍力戰

明紀卷十三

七

遂拔之斬首五萬餘級進自夾象石渡下江通高黎貢山道癸丑免河南山東及鳳陽等府稅糧 封譚廣爲永寧伯仍鎮宣府 互刺入貢詔問劉中敷等馬駝芻粟數不能對閏月甲戌復下獄論斬中敷以母病特許歸省吳璽陳瑞繫獄待決中敷等本無大過帝察察示明而王振以酷助之楊士奇楊溥猶在位莫能救也 王驥至騰衝長驅抵杉木籠山賊乘高據險築七壘相救驥遣參將宮聚副將劉聚分左右翼緣嶺上而自將中軍奮擊之賊大潰乘勝至馬鞍山侯璉亦擊走賊眾三萬於大侯州由高黎貢山兼程夜行來會十二月抵賊巢山陡絕深塹環之東南面江壁立不可上驥遣前軍覘賊敗其伏兵賊更自間道立柵馬鞍山出大軍後驥戒軍中無動而令都指揮

方瑛帥兵六千突賊壘賊渠衣黃衣帳中瑛直前左右擊斬數百人躡死者無算瑛政之子也驥復誘敗賊象陳會東路軍再保等已合木邦車里大侯諸土軍破烏木弄戛邦諸寨遣別將守西峩渡刻期與大軍會驥乃督諸將環攻其七門積薪縱火風大作賊焚死無算溺江死者數萬人思任發攜二子走孟養獲其虎符金牌宣慰司印及所掠騰衝諸衛所印章三十有奇犁其巢穴留兵守之丁未班師諸軍之進攻也令李安駐軍潞江護饜賊破安恥無功聞有賊屯高黎貢山徑往擊之爲所敗失士卒千餘人都指揮趙斌等皆死 貴州奏軍衛乏糧乞運龍江倉及兩淮鹽於鎮遠易米南京戶部侍郎張鳳以龍江鹽雜泥沙不堪易米給軍盡以淮鹽與之然後以聞帝嘉賞鳳又

明紀卷十三

六

言留都重地宜歲儲二百萬石爲根本計從之遂爲令 昌邑民王坦上言漕河水淺軍卒窮年不休往者江南常海運自太倉抵膠州州有元時膠萊河故道接掖縣宜濬通之由掖浮海抵直沽可避東北海險數千里較漕河爲近部覆寢其議

七年春二月庚申帝如天壽山謁長陵獻陵景陵三月甲子還宮 乙亥免陝西屯糧十之五 夏四月甲午振陝西饑 免

山西河南山東被災稅糧 王驥遣偏師討維摩土司韋郎羅俘其妻子郎羅走安南傳檄縛之以獻 五月征麓川師還帝遣戶部侍郎王質齋羊酒迎勞賜宴奉天門壬申論功進蔣貴爵爲侯封王驥靖遠伯劉聚等遷賞有差從征少卿李蕡郎中侯璉楊壺皆擢侍郎士卒賜予加等府庫爲竭李安逮下獄謫

戊獨石 戊寅立皇后錢氏擢后父都指揮僉事貴爲都督同知帝欲侯貴以后遜謝而止 丁亥倭陷大嵩所殺官軍百人掠三百人糧四千四百餘石軍器無算六月壬子戶部侍郎焦宏整飭浙江備倭事兼理蘇松福建 秋七月丙寅振陝西饑民贖民所鬻子女 思任發之走孟養也爲木邦宣慰罕蓋法所擊追過金沙江走孟廣緬甸宣慰卜刺當亦起兵攻之帝命木邦緬甸能效命禽任發獻者卽予以麓川地未幾思任發爲緬甸所禽其子思機發帥餘眾居者藍窮困乞入朝謝罪廷議因而撫之王振不可八月壬寅復命王驥總督雲南軍務帥參將冉保毛福壽以往驥未至思機發遣弟招賽入貢命遣還雲南安置且救驥圖緬甸驥因請濟師 九月甲戌陝西進嘉禾

明紀卷十三

九

禮官請表賀不許 初瓦剌貢使不過五十人其後利朝廷賞賜所遺動以千計大同供應費至三十餘萬是春帝以貢使太多限三百人入關及秋至大同者復二千餘人以馬易弓藏於衣篋不可勝計巡撫都御史羅亨信請於居庸關詰檢之不許郭敬歲造箭鏃數十甕遺其使帝亦不問 冬十月壬辰兀良哈犯廣寧詔切責總兵官曹義命王翱提督遼東軍務翱以軍令久弛寇至將士不力戰因諸將庭謁責以失律罪命左右曳出斬之皆惶恐叩頭願效死贖翱乃躬行邊起山海關抵開原繕城垣濬溝塹五里爲堡十里爲屯使烽燧相接練將士室餼寡軍民大悅又以邊塞孤遠軍饑置緣俗立法令有罪得收贖十餘年間得穀及牛羊數十萬邊用以饒 乙巳太皇太后大

漸召楊士奇楊溥入命中官問國家尙有何大事未行者士奇舉三事一謂建文君雖亡當修實錄二謂永樂詔收方孝孺遺書者死宜弛其禁其三未及奏上而太皇太后已崩遣詔勉大臣佐帝惇行仁政語甚諄篤 劉中敷等冬盡當決法司以請命吳璽陳瑄戍邊中敷俟母終具奏已釋爲民 十二月葬誠孝昭皇后於獻陵后既崩王振勢益盛大作威福起大第皇城東建智化寺窮極土木帝方傾心嚮振嘗以先生呼之公侯勛戚呼曰翁父畏禍者爭附振免死賕賂輳集 蘇州知府况鍾卒吏民聚哭爲立祠鍾剛正廉潔孜孜愛民前後守蘇者莫能及 初設戶部太倉庫凡各直省派剩麥米十庫中綿絲絹布及馬草鹽課關稅折銀者及籍沒家財變賣田產追收店錢援例上納者皆入焉又謂之銀庫 處州礦盜葉宗留陳鑑胡等起

明紀卷十三

三

八年春正月郭璉罷王直代爲吏部尙書時初罷廷臣薦舉方面大吏專屬吏部直委任曹郎嚴抑奔競凡御史巡方歸者必令其所屬賢否以備選擇稱得人其子積爲南京博士考績至部文選郎欲留侍直直不可曰是亂法自我始也 二月己丑沙汰南京冗官 戊戌淮王瞻垓來朝丙午荆王瞻垞來朝 三月刑部尙書魏源致仕詔博舉廷臣公廉有學者王直等舉侍郎王質鄭埜郎中劉廣衡御史張驥遂以質代源源在刑部久議獄多平恕陝西僉事計資言武臣雜犯等罪予半俸謫極邊源奏寢之郎中林厚言禁刁訟告訐擇理刑官勘重囚務

憑賊具皆以源議得行 夏五月己巳復命平蠻將軍蔣貴王
驥師師征思機發調土兵五萬往發卒轉饗五十萬人 倭寇
海寧初黃巖民周來保龍巖民鍾普福困於徭役叛入倭倭每
入寇爲之鄉導幾二十年至是導倭犯樂清先登岸偵伺破獲
磔之梟其首置海上倭性黠往往陳方物稱朝貢得間卽肆侵
掠東南海濱患之 戊辰雷震奉天殿鴟吻敕修省壬午大赦

劉球應詔上言所宜先者十事其畧曰古聖王不作無益故
心正而天不違之臣願皇上勤御經筵數進儒臣講求至道務
使學問功至理欲判然則聖心正而天心自順夫政由己出則
權不下移太祖太宗日視三朝時召大臣於便殿裁決庶政權
歸總於上皇上臨御九年事體日熟願守二聖成規復親決故

明紀卷十三

三

事使權歸於一古之擇大臣者必詢諸左右大夫國人及其有
犯雖至大戮亦不加刑第賜之死今用大臣未嘗皆出公論及
有小失輒極桎筴楚之然未幾時又復其職甚非所以待大臣
也自今擇任大臣宜允愜眾論小犯則置之果不可容下法司
定罪使自爲計勿輒繫庶不乖共天職之意今之太常卽古之
秩宗必得清慎習禮之臣然後可交神明今卿貳皆缺宜選擇
儒臣使領其職古者省方巡狩所以察吏得失問民疾苦兩漢
唐宋盛時數遣使巡行郡縣洪永間亦嘗行之今久不舉故吏
多貪虐民不聊生而軍衛尤甚宜擇公明廉幹之臣分行天下
古人君不親刑獄必付理官蓋恐徇喜怒而有所輕重也邇法
司所上獄多奉敕增減輕重法司不能執奏及訊他囚又觀筆

以爲輕重民用多寃宜使各舉其職至運輒輸米諸例均非古法尤宜罷之春秋營築悉書戒勞民也京師興作五六年矣曰不煩民而役軍軍獨非國家赤子乎况營作多完宜罷工以蘇其力各處水旱有司旣不振救請減租稅或亦徒事虛文宜令戶部以時振濟量加減免使不致失業麓川連年用兵死者十七八軍資餉賞不可勝計今又遣蔣貴遠征緬甸責獻思任發果禽以歸不過梟諸通衢而已緬將挾以爲功必求與木邦共分其地不與則致怒與之則兩蠻坐大是減一麓川生二麓川也設有蹉跌兵事無已臣見皇上每錄重囚多看令從軍仁心若此今欲生得一失地之竄寇而驅數萬無罪之眾以就死地豈不有乖於好生之仁哉況思機發已嘗遣人來貢非無悔過

乞免之意若敕緬斬思任發首來獻仍敕思機發盡削四境之地分於各寨新附之蠻則一方可寧矣迺北貢使日增包藏禍心誠爲難測宜分遣給事御史閱視京邊官軍及時訓練勿使借工各廠服役私家公武舉之選以求良將定召募之法以來武勇廣屯田公鹽法以厚儲蓄庶武備無缺而外患有防疏入下廷議從其擇太常官一事令吏部推舉初球言麓川事王振固已銜之欽天監正彭德清者球鄉人也爲振腹心倚勢爲奸欺公卿多趨謁而球絕不與通德清恨之遂摘疏中攬權語謂振曰此指公耳振益大怒會修撰董璘上疏乞改官太常振遂指球同謀六月丁亥逮球及璘下錦衣衛獄密使指揮馬順殺球順深夜攜一小校持刀至球所球方卧起立大呼太祖太宗

頸斷體猶植順支解之瘞獄尸下璘從旁竊血裙遺球家後其子鉞求得一臂裹裙以斂球之上疏也修撰鍾復約與俱復妻勸阻復球詣復邸邀偕行復適他往妻從屏間詈曰汝自上疏何累他人爲球歎曰彼乃謀及婦人遂獨上疏竟死居無何復亦病死妻深悔之每哭輒曰早知爾曷若與劉君偕死復子同尙幼聞母言感奮思成父志順有子病久忽起摔順髮拳且蹴之曰老賊令爾他日禍逾我我劉球也順驚悸俄而子死小校亦死 指揮某死妾有色王振從子山欲納之指揮妻不肯妾遂訐妻毒殺夫下都察院訊已誣服大理辨其冤三卻之時百官多奔走振門惟薛瑄仰瞻不往右都御史王文承振指誣瑄及左右少卿賀祖嗣顧惟敬等故出人罪振復諷言官劾瑄受

明紀卷十三

三

賄甲辰並下獄論瑄死祖嗣等未減有差贍謫戍大同瑄讀易自如子三人願一子代死二子充軍不允及當行刑振蒼頭忽泣於爨下呼問故益悲曰聞今日薛夫子將刑也振大感動會刑科三覆奏兵部侍郎王偉亦申救乃免 李時勉爲祭酒請改建國學帝命王振往視時勉待振無加禮振銜之廉其短無所得時勉嘗芟彝倫堂樹旁枝振遂言時勉擅伐官樹入家秋七月戊午中旨令與司業趙琬掌饌金鑑並枷國子監前時勉方坐東堂閱課士卷徐呼諸生品第高下顧僚屬定甲乙揭榜乃行時尙盛暑枷三日不解監生李貴等千餘人詣闕乞貸有石大用者上章願以身代諸生圍集朝門呼聲徹殿廷振聞諸生不平恐激變及通政司奏大用章振內慙助教李繼請解於

會昌侯孫忠忠皇太后父也忠生日太后使人賜忠家忠附奏
曰臣荷恩厚願赦李祭酒使爲臣客坐無祭酒臣不歡太后爲
言之帝帝初不知也立釋之 王驥等帥師至金齒九月甲子
思機發遣頭目刀籠肘偕其子詣軍門求降驥遣人至緬甸索
思任發緬使致書期以今冬送思任發至貢章交付驥與刻期
遣指揮李儀等帥精騎通南牙山路往受而緬人竟不至冬驥
與蔣貴沐昂分五營自騰衝進逼緬甸緬人聚眾待以樓船載
思任發覘官軍而潛以他舟載之歸驥以麓川未平緬難不可
復作乃宣言犒師而命貴等潛焚其舟數百艘遂移師趨者藍
誠孝皇后崩宣宗廢后胡氏痛哭不已十一月卒以嬪御禮
葬金山 十二月癸未免山東復業民稅糧二年 丙戌柳駙

明紀卷十三

十四

馬都尉焦敬於長安右門 孫原貞爲浙江左布政使時按察
使軒輓杭州知府陳復仁和知縣許璞鎮守中官阮隨及原貞
居官皆廉一方大治 赤斤蒙古衛都督且旺失加苦也先暴
橫欲移駐也洛卜刺任禮以其地近肅州執不許已奏請建寺
於其地禮復言許其建寺彼必移居遺後患事竟寢時邊將家
僮壅塞上田者每頃輸糧十二石禮連請於朝得減四石邊塞
無警禮與巡撫曹翼屯田積粟繕甲訓兵邊備甚固 時陝西
倉儲充溢有軍衛者足支十年無者可支百年陳鑑以陳腐委
棄可惜請每歲春夏時給官軍爲月饌不復折鈔從之 楊榮
旣沒楊士奇常病不視事閣務多決於曹鼐鼐內剛外和通達
政體帝以爲賢

明紀卷第十三終

明紀卷十三

三

明紀卷第十四

賜書身部候補事虞衡行書陳鶴龔

龔贈知府繪畫騎尉職內閣候補書獮兒家參

英宗紀二

起正統九年甲子訖正統二十四年己巳失位凡六年

九年春正月進魏翰林學士 甲寅王文巡延綏夏邊劾治

定邊營六律都督僉事王禎都督同知黃真邊徼爲肅 朵顏

福餘二衛附瓦剌泰寧衛拙赤以女妻也先皆陰爲之耳目入

貢輒易名且互用其印又東合建州兵入廣寧前屯帝惡其反

覆辛未朱勇吳克忠及中官錢僧保出喜峯口徐亨及中官曹

吉祥出界嶺口都督馬亮及中官劉永誠出劉家口陳懷及中

官但住出古北口各將精兵萬人分勦之 二月丙午王驥破

思機發巢走之得其妻子部落以獻蔣貴子雄乘敵敗帥三千

明紀卷十四

一

人深入敵扼其後自勿沈烏江事聞贈指揮使帝尋召驥等還

三月辛亥朔新建太學成釋奠於先師孔子 楊士奇老耄

子稷傲很嘗侵暴敵人言官交章劾稷朝議不卽加法封其狀

示士奇復有人發稷橫虐數十事遂下之理士奇以老疾在告

帝恐傷其意降詔慰勉士奇感泣憂不能起甲子卒年八十贈

太師諡文貞有司乃論殺稷士奇雅善知人好推轂賢士所薦

達有初未識面者子謙周忱况鍾之屬皆爲世名臣 朱勇等

捕兀良哈擾邊者奪回所掠人畜馬亮劉永誠至黑山大松林

流沙河徐亨至河北川勇至富峪川而還乙丑論功加勇太保

進亨爵俟封陳懷平鄉伯亮招遠伯是役也王振主之故諸將

功少率得封 夏四月丙戌翰林學士陳循直文淵閣預機務

初廷議天下吏民建言章奏皆三楊王之至是士奇榮已卒循
及曹鼐馬愉在內閣禮部援故事請帝以楊溥老宜優閒令循
等預議 初也先欲與沙州及赤斤蒙古二衛婚二衛不欲並
奏遵奉朝命不敢擅婚帝以瓦刺方強其禮意不可卻諭令各
從其願赤斤蒙古又遣人乞徙善地帝諭以土地不可棄令獎
帥頭目圖自強丁亥以二衛饑困令邊人給粟振之 五月己
未命法司錄在京刑獄刑部侍郎馬昂錄南京刑獄 給事中
李素等劾周忱妄意變更專擅科斂忱上章自訴帝以餘米既
爲公用置不問先是奸民尹崇禮欲撓忱法奏忱不當多徵耗
米請究問倉庫主者忱因罷前法旣而兩稅復逋民無所賴咸
稱不便忱乃奏按崇禮罪舉行前法如故 六月壬午振湖廣

明紀卷十四

二

貴州蠻饑 駙馬都尉石璟冒其家奄王振以爲賤己同類惡
之秋七月己酉下璟獄 葉宗留盜福安銀礦福建參議竺淵
往捕之被執死 癸丑免河南被災稅糧 初福建浙江有銀
場洪武中歲課五千餘兩永樂宣德間遞增至十三萬兩有奇
民不堪命帝卽位以大臣議罷之己而盜礦者日熾浙江參政
俞士悅請復開謂利歸於上則礦盜自絕下三司議軒輓持不
可乃止閏月戊寅給事中陳傳復請朝廷遽從之命侍郎王質
往經理定福建歲課銀二萬餘兩浙江倍之又分遣御史曹祥
馬傑提督供億過公稅自是民困而盜愈眾 甲申瘞暴骸
壬寅雷震奉先殿鴟吻 八月庚戌免陝西被災稅糧贖民所
鬻子女 時也先漸強遣人授罕東諸衛都督喃哥等爲平章

又置甘肅行省名號陳益以聞甲戌敕邊將嚴備九月丁亥命王驥與益巡視甘肅寧夏延緩邊務聽便宜處置初寧夏備邊軍半歲一更後邊事亟三年乃更軍士日久疲憊又益選軍餘防冬家有五六人在邊者軍重困驥請歲一更當代者以十月至而代者留至來歲正月乃遣歸邊備足而軍不勞帝善其議行之諸邊初成祖封忠順王以哈密爲西域要道欲其迎護朝使統領諸番而其王率庸懦其地種落雜居一曰回回一曰畏兀兒一曰哈刺灰其頭目不相統屬王莫能節制及倒瓦答失里立與鄰國土魯番沙州罕東赤斤蒙古構怨數被侵伐瓦刺也先王母弩溫答失里弟也亦遣兵圍哈密殺頭目俘男婦掠牛馬駝取王母及妻北還脅倒瓦答失里往見懼不敢往數

明紀卷十四

三

遣使告難帝爲敕諸部令脩好迄不從惟王母妻獲還分麓川地置隴川宣撫司治隴把冬十月丙午朔日有食之庚午兀良哈貢馬謝罪永寧伯譚廣卒諡襄毅廣長身多力奮跡行伍大小百餘戰未嘗挫衄在宣府二十年脩屯堡嚴守備增驛傳又請頒給火器於各邊將校失律卽奏請置罪而撫士卒有恩邊徼帖然稱名將御史李儼於光祿寺監收祭物王振過之怒其應對不跪下錦衣衛獄謫戍鐵嶺衛時馬順掌鎮撫司罪無大小悉送順考訊陷害甚眾順大通賄賂其門如市是年兩畿山東河南浙江湖廣大水江河皆溢

十年春正月大計羣吏舉治行卓異者趙豫及寧國知府袁旭鳳陽知府楊瓚吳縣知縣葉錫海豐知縣王懋慶雲典史趙亮

預焉賜宴及襲衣遣還職旭尋爲督學御史程富所誣劾逮死
獄中寧國人惜之立祠祀焉 戊子詔舉智勇之士 王振專
恣日甚中官張環顧忠錦衣衛卒王永心不平以匿名書暴振
罪狀事發磔於市不覆奏 二月丁巳京師地震 己未免陝
西逋賦 丙寅兀良哈貢馬請貸犯邊者罪不許 壬申帝如
天壽山三月甲戌朔謁陵丙子還宮 庚辰思機發入貢謝罪
時麓川甫平參贊軍務侍郎楊寧以騰衝所地要害請升爲騰
衝軍民指揮使司與沐昂築城置衛設戍兵控諸蠻邊方遂定
昂尋卒贈定邊伯諡武襄 夏四月甲辰朔日有食之 庚申
詔所在有司餉逃民復業及流移就食者 六月乙丑振陝西
饑免田租三之二 秋七月乙未減糶河南懷慶二府倉粟濟
山東陝西饑民從于謙請也時二省民就食河南者二十餘萬
公勦掠謙奏令布政使年富安輯其眾授田給牛種使里老司
察之流民乃定 有中官牧馬霸州擾民知州張需笞其校卒
王振怒逮需下錦衣衛獄箠楚幾死詔戍邊并斥其舉主順天
府丞王鐸爲民需在州見民游食者眾爲設方略課耕桑樹畜
不如教者罰之民皆勤力州以富饒其得禍也人尤惜之 八
月癸丑免湖廣旱災秋糧 丙辰免蘇松嘉湖十四府州水災
秋糧 九月鄭瑩爲兵部尙書舊例諸衛自百戶以下當代者
必就試京師道遠無資者終身不得代瑩請令就各都司試之
人以爲便瓦剌也先勢盛瑩請爲備又與廷臣議上方略請增
大同兵擇智謀大臣巡視西北邊務尋又請罷京營兵脩城之

役令休息以備緩急時不能用 冬十月戊辰侍讀學士苗衷
爲兵部侍郎侍講學士高穀爲工部侍郎並入閣預機務 王
文出撫陝西陳鎰爲右都御史先是流民聚襄漢間鎰恐其嘯
聚爲亂請命河南湖廣陝西三司官親至其地撫卹之得旨允
行而當事者不以爲意及文代鎰復力言有可怠忽恐遺禍將
來不省 緬甸始以思任發及其妻孥三十二人獻至雲南思
機發來襲總兵官黔國公沐斌擊却之任發於道中不食垂死
十二月丙辰千戶王政斬之函首京師斌晟之子也機發屢乞
降詞甚哀帝命受其貢敕斌及楊寧經畫善後長策以聞并賜
敕諭機發木邦遣使同獻任發首因求麓川地以孟止地予之
壬辰輸河南粟振陝西饑 柳溥討平慶遠叛蠻溥廉愼然

明紀卷十四

五

無將略承山雲後不能守成法過於寬弛猗獐相扇爲亂溥先
後討斬大藤峽賊渠楊容拾等破柳州思恩韋萬慶等諸蠻寨
而賊滋蔓如故 以曹縣黃河北舊土城置曹州升曹縣知縣
范希正爲知州先是山東饑惟曹以希正先積粟得無恙巡撫
大理寺丞張驥以聞故有是命 時遣官度大同宣府二鎮軍
田一軍八十畝外悉徵稅五升羅亨信言文皇帝時詔邊軍盡
力墾田毋徵稅陛下復申命之今奈何忽爲此舉塞北諸軍防
邊勞苦無他生業惟事田作每歲自冬徂春迎送瓦刺使臣三
月始得就田七月又復刈草八月以後脩治關塞計一歲中曾
無休暇況邊地磽瘠霜早收薄若更徵稅則民不復耕必致竄
逸計臣但務積粟不知人心不固雖有粟將誰與守帝納其言

而止

十一年春正月庚辰太監王振姪林世襲錦衣衛指揮僉事錢曾保姪亮高讓姪玉曹吉祥弟整蔡忠姪革俱世襲副千戶

二月辛酉異氣見華蓋殿金頂及奉天殿鴟吻之上遣官祭告

天地癸亥詔卹刑獄安鄉伯張安與弟爭祿詔速治法司與

戶部相諉爲言官所劾三月戊辰戶部尙書王佐刑部尙書金

濂右都御史陳鎰侍郎丁鉉馬昂副都御史丁璿程富等俱下

獄數日釋之安與兄之孫也福建銀場旣開盜礦者益眾葉

宗留僭稱王遣戶部郎中楊謹往招撫浙江參議吳昇言福建

礦盜出沒浙江江西廣東諸境東捕則西逃南搜則北竄若合

而爲一其患不小宜特遣朝臣專董剿捕壬申命御史柳華督

明紀卷十四

六

福建浙江江西兵討之華至福建遣兵分捕羣盜又令村聚皆置隘門望樓編民爲甲擇其豪爲長得自置兵仗督民巡徼盜稍戢而宗留劫掠如故癸酉帝如天壽山庚辰還宮夏六

月丙辰京師地震初帝卽位詔凡課程門難俱遵洪武舊額

不得藉口鈔法妄增尋以于謙奏革直省稅課司局領其稅於

有司及是軍旅四出耗費動以鉅萬府庫空虛秋七月癸酉從

王佐請增市廛稅鈔置彰義門官房收商稅課鈔復設直省稅

課司官征權漸繁矣庚辰楊溥卒年七十五贈太師諡文定

大理寺丞羅綺參贊夏軍務嘗以事劾指揮任信陳斌二

人皆王振黨轉許綺不法事下總兵官黃眞覆覈眞謂綺常言

宦官爲老奴遂召綺還法司擬贖振改令馬順再鞫八月諭成

遼東 戊戌免湖廣被災秋糧 戶部侍郎奈亨附王振嘗以
事干請吏部不行怨郎中趙敏構之詞連王直及侍郎曹義趙
新庚申下直等獄三法司廷鞫論亨斬直等贖徒帝宥直義奪
亨新俸視職如故 行人尙禡言古者刑不上大夫今文武大
臣偶因微眚遽陷囹圄事或涉虛旋卽復職是今日衣冠之大
臣卽昨日受辱之囚繫面僚友而統屬官豈能無愧請自今有
犯者召至午門大臣會問事實則疏其輕重請上裁決不實卽
奏還其職帝頗然之或於王振不能改 九月辛巳廣西叛猺
執化州知州茅自得殺千戶汪義 沙州衛都督喃哥兄弟乖
爭部眾攜貳任禮欲乘其饑窘遷之內地會喃哥亦請居肅州
境內禮因遣都指揮毛哈喇往撫其眾而親帥兵繼其後比至

明紀卷十四

七

喃哥復持兩端其部下欲奔瓦剌禮進兵逼之遂收其全部千
二百餘人以還詔居之東昌平山二衛給田廬什器厚撫卹之
而沙州爲罕東左衛酋班麻思結所有初成祖置哈密沙州赤
斤罕東四衛於嘉峪關外屏蔽西陲至是沙州先廢諸衛亦漸
不能自立肅州遂多事 冬十月甲寅遣給事中御史分資諸
邊軍士 十一月壬申減殊死以下罪 金濂薦李信圭擢處
州知府其在清河已二十二年矣處州方苦旱信圭至卽雨未
幾卒官清河民立祠祀之 也先攻兀良哈遣使抵大同乞糧
并請見守備太監郭敬帝敕敬毋見毋予糧
十二年春三月癸亥帝如天壽山庚午還宮 丙子免杭嘉湖
被災秋糧 鳳陽知府楊瓚言民間子弟可造者多請增廣生

貞毋限額禮部採瓚言者取附學天下學校之有附學生自此始 詔選侍講江淵杜寧裴綸脩撰劉儼尚輅編脩陳文楊鼎呂原劉俊王玉肄業東閣曹鼐等爲之師 國子監祭酒李時勉連疏致仕朝臣及國子生餞都門外者幾三千人或遠送至登舟候舟發乃去時勉爲祭酒六年列格致誠正四號訓勵甚切崇廉恥抑奔競別賢否示勸懲諸生貧不能婚葬者節省餐錢爲贍給督令讀書吟誦聲達旦不絕張輔暨諸侯伯嘗奏願偕詣國子監聽講帝命以三月三日往時勉升師席諸生以次立講五經各一章畢事設酒饌諸侯伯讓曰受教之地當就諸生列坐惟輔與抗禮諸生歌鹿鳴之詩賓主雍雍盡暮散去人稱爲太平盛事 夏四月丁巳免蘇松常鎮被災秋糧 五月

明紀卷十四

八

己亥大理少卿張驥巡視濟寧及淮揚饑民驥立法捕蝗停不急務蠲逋發廩民賴以濟 有自瓦剌來歸者言也先謀入寇脫脫不花止之也先不聽尋約諸番共背中國秋七月甲辰飭各邊練軍備瓦剌 八月庚申朔日有食之 九月乙未馬愉卒贈禮部尚書兼學士贈官兼職自愉始愉端重簡默門無私謁論事務寬厚嘗言天下獄久者多瘕死宜簡使者分道決遣邊警方命將而別部使至眾議執之愉言賞善罰惡爲治之本波及於善非法乘人之來而執之不武帝皆納焉 冬命張鳳兼理南京糧儲 欽天監言北京北極出地度太陽出入時刻與南京不同冬夏晝夜長短亦異今宮禁及官府漏箭皆南京舊式不可用有旨令內官監改造 初方面大吏方正謝莊等

由保舉擢用已而得罪而不預保舉者在內御史在外知府往
往九年不遷給事中余忭論正莊等事敗謂宜坐舉主且言方
面郡守有缺吏部當奏請上裁張輔王直等言方面郡守保舉
升用稱職者多未可更易帝從輔直議而採忭疏許言官指劾
楊洪充總兵官鎮宣府自宣德已來迤北未嘗大舉入寇惟
朵顏三衛眾乘間擾邊多不過百騎或數十騎他將率吳儒洪
獨以敢戰至大將諸部亦憚之稱爲楊王 安南遣將侵占城
奪新州港虜其王摩訶賁該以歸其故王占巴的賴姪摩訶貴
來遣使請命遣給事中陳誼行人薛幹往封爲占城國王 沐
斌言臣遣使賁敕招諭思機發以其弟招賽未歸疑懼不敢出
又掠緬甸牛馬金銀緬甸欲進兵攻取請遣人分諭木邦緬甸
衛其從人俱令於馴象所供役

明紀卷十四

九

諸宣慰司令集蠻兵刻期過江分道進討臣等帥官軍萬人駐
騰衝以助其勢從之斌等至騰衝機發終不出敕孟養頭目刀
變蠻等伴送機發來朝復不至尋召招賽至京給冠帶隸錦衣
十三年春斌以春瘴作江漲不可渡糧亦乏引兵還時中外咸
願罷兵獨王振意未愜欲盡滅其種類三月戊子降敕切責刀
變蠻等數其可伐之罪令執獻機發壬寅王驥仍總督軍務都
督同知宮聚爲平蠻將軍充總兵官帥十五萬人討機發密諭
驥曰萬一思機發遠遁則先禽刀變蠻平其巢穴或遁入緬地
緬人黨蔽亦相機禽之庶蠻眾知懼大軍不爲徒出又敕木邦
緬甸南甸干崖隴川各整兵備船積糧以俟調度 柳華之編

民爲甲也沙縣佃人鄧茂七得推擇爲甲長茂七素無賴及是益以氣役屬鄉民沙縣俗佃人輸租外例饋田主茂七倡其黨令毋饋而田主自往受粟田主訴於縣縣逮茂七不赴下巡檢追攝茂七殺弓兵數人上官聞遣軍三百捕之被殺傷幾盡巡檢及知縣並遇害茂七遂大剽掠僞稱剽平王設官屬黨數萬人陷二十餘縣都指揮范真指揮彭璽等先後被殺處州賊葉宗留陳鑑胡等並附茂七東南騷動初交阯人宋彰爲福建參政賄王振得遷左布政使浸漁貪惡民不能堪益相率從亂福建巡按御史汪澄牒江西浙江會兵討賊夏四月茂七圍延平刷卷御史張海登城無諭賊訴乞贖死免三年徭役卽解散爲良民海以聞澄尋以賊降檄止鄰境兵江西巡按御史韓雍曰

明紀卷十四

十

賊果降退未晚也遂趣兵進免浙江江西湖廣被災秋糧

五月丙戌遣使捕山東蝗甲辰刑部侍郎丁鉉撫輯河南山

東災民鉉平居恂恂若無能臨事悉治辦時朝野皆用銀小

者用錢惟折官俸用鈔鈔壅不行是月申禁令阻鈔者追一萬

貫全家戍邊六月升蒙化州爲府先是河決金龍口陽穀

堤及張家黑龍廟口徐呂二洪漸淺太黃寺巴河分水處水脈

微細帝從都督同知武興言發卒疏濬已陳留水漲決金村堤

及黑潭南岸築垂竣復決秋七月乙酉朔河決大名滄三百餘

里壞廬舍二萬區死者千餘人遣使蠲振寧夏大水河決漢唐

二壩己酉決新鄉八柳樹口滎澤孫家渡漫曹濮抵東昌衝張

秋潰壽張沙灣壞運道東入海開封城初在河南及是在河北

二洪遂浚濇命工部侍郎王永和往理其事 御史涂謙陳保舉得方面郡守輒改前操之弊請遵洪武舊制於內外九年考滿官內簡用或親擇朝臣有才望者詔從之大臣舉官之例遂罷 八月甲戌御史丁瑄討鄧茂七都督劉聚僉都御史張楷帥大軍繼其後瑄至先令人齎敕撫茂七不從遂馳赴沙縣圖賊賊首林宗政等萬餘人攻後坪欲立砦瑄令通判倪冕等帥眾先據要害而身與都指揮雍莖等邀其歸路斬賊二百餘級獲其渠陳阿巖張楷至建寧頓不進日置酒賦詩爲樂冬葉宗畱自福建轉犯江西官軍不利都督僉事陳榮指揮劉真遇伏死詔韓雍及鎮守侍郎楊寧督軍民協守張驥巡撫浙江遂昌賊蘇牙俞伯通剽蘭溪與宗畱相應驥遣金華知府石瑁擊斬

明紀卷十四

七

牙等撫定其餘黨帝以楷等無功十一月丙戌詔陳懋佩征南將軍印充總兵官保定伯梁瑋平江伯陳豫副之太監曹吉祥王瑾提督火器刑部尚書金濂參贊軍務帥京營江浙兵討茂七瑋銘之子豫瑄之孫也鑑胡以爭忿殺宗畱專其眾自稱大王國號太平建元泰定僞署將帥圍處州甲辰分遣其黨掠武義松陽龍泉永康義烏東陽浦江諸縣茂七黨二千餘人迫建寧城結砦四出剽掠知府張瑛帥建安典史鄭烈會都指揮徐信軍分三路襲之斬首五百餘拔其砦進瑛右參議仍知府事烈亦遷主簿 庚戌永康侯徐安備倭山東安忠之子也 十二月庚午廣東猺賊作亂 初沙州內徙喃哥弟鎖南奔不從奔瓦剌也先封之爲祁王任禮以二寇合則勢益難制遣人招

之鎖南奔欲降未決禮合毛哈喇潛師直抵罕東生繫之以歸
并其部眾帝大喜賜禮世券擢哈喇都督僉事賜名忠 王永
和修沙灣未成以冬寒停役且言河決自衛輝宜敕河南守臣
修塞帝切責之令山東三司築沙灣趣永和塞河南八柳樹疏
金龍口使河由故道 陳懋至浙江有欲分兵扼海口者懋曰
是使賊將致死於我也不可 時朝使至瓦剌也先等有所請
乞無不許瓦剌使來更增至三千人復虛其數以冒廩餼禮部
按實予之所請僅得五之一貢馬互市王振又減其馬直使者
恚而去也先由是構懋

十四年春正月乙巳免浙江福建銀課 定西侯蔣貴卒贈涇
國公諡武勇貴起卒伍不識字天資朴實忘己下人能與士卒

明紀卷十四

主

同甘苦出境討賊衣糧器械常身自囊負不役一人臨陳輒身
先之以故所向有功 大軍征思機發雲貴軍民疲敝苗乘機
煽動閩浙間盜賊大起舉朝皆知其不可懲劉球禍無敢諫者
巡按貴州御史陳鑑言賊酋遠遁不爲邊患宜專責雲南守臣
相機勦滅無遠勞禁旅王振怒改鑑雲南參議使赴騰衝招賊
已復撫鑑爲巡按時嘗請改四川播州宣慰司隸貴州爲鑑罪
論死繫獄 河決聊城 二月丁巳丁瑄誘賊復攻延平督眾
軍分道衝擊賊大敗遁走指揮劉福追之斬茂七招脅從復業
未幾復禽其黨林子得等尤溪賊首鄭永祖帥四千人攻延平
瑄偕雍埜等邀擊禽之斬首五百有奇餘黨潰散張楷聞瑄破
賊馳至延平攘其功福不平愬之詔責瑄具狀功竟不錄 王

驥帥諸將方瑛李震等自騰衝會師由千崖造舟至南牙山舍舟陸行抵沙壩復造舟至金沙江思機發於西岸列柵拒守大軍順流至管屯木邦緬甸兩宣慰兵十餘萬列於沿江兩岸緬甸備舟二百餘爲浮梁濟師并力攻破其柵得積穀四十萬餘石軍飽氣銳賊退至鬼哭山築大寨於兩峯上旁築二寨爲兩翼又築七小寨綿亘百餘里官軍分道並進皆攻拔之斬獲無算機發及其弟思卜發遁去時官軍逾孟養至孟那海地在金沙江西去麓川千餘里諸部皆震怖曰自古漢人無渡金沙江者今王師至此真天威也驥慮饋餽不繼引還機發少弟思祿復擁眾據孟養驥度賊終不可滅乃與思祿約許以土目部勒諸蠻居孟養如故立石金沙江爲界誓曰石爛江枯爾乃得渡

明紀卷十四

三

思祿懼聽命已已驥班師以孟養地予緬甸命捕機發驥三征麓川老師費財以一隅騷動天下會川衛訓導詹英言驥等多役民昇綵緡散諸土司以邀厚利擅用腐刑詭言進御實充私役師行無紀十五萬人一日起行互相蹂踐每軍負米六斗跋涉山谷自縊者多抵金沙江傍徨不敢渡旣渡不能攻攻而失都指揮路宣程亨等俟賊解多捕魚戶爲俘以地分木邦緬甸掩敗爲功此何異李宓之敗楊國忠以捷聞也奏下法司王振左右之得不問 辛未指揮僉事徐恭充總兵官討處州賊工部尚書石璞參贊軍務 三月戊子帝如天壽山癸巳還宮 王永和濬黑洋山西灣引其水由太黃寺以資運河修築沙灣大半而不敢盡塞置分水閘設三空放水自大清河入海且設

分聞二空於沙灣西岸以泄上流而請停八柳樹工從之夏
四月庚戌處州賊犯崇安殺都指揮吳剛湖廣貴州諸苗所
在蜂起鎮遠蠻苗金臺僞稱順天王壬戌命王驥討之乙丑
遣御史十三人同中官督福建浙江銀課分守諸府御史朱英
往處州賊黨四出剽掠道梗英聞道馳至撫降甚眾戮賊首周
明松等鄧茂七死陳鑑胡勢孤張驥命麗水縣丞丁寧帥老
人王世昌等齎榜入賊巢招之鑑胡遂偕其黨六十餘人出降
惟陶得二不就撫殺使者入山爲亂如故茂七之死也餘賊擁
其兄子伯孫據九龍山拒官軍陳懋至建寧諸將欲盡屠尤溪
沙縣諸賊懋曰是堅賊心也乃下令招撫賊黨多降懋乃遣諸
將分道逐捕五月丙戌金濂與眾謀羸師誘伯孫出伏精兵入

明紀卷十四

四

其壘禽之帝乃移張楷浙江而畱濂福建擊平餘賊未下者
壬辰以旱太監金英同法司理刑部都察院獄囚築壇大理寺
英張黃蓋中坐尙書以下左右列坐自是六年一審錄制皆如
此己亥侍讀學士張益直文淵閣預機務沙縣賊陳政景
糾清流賊藍得隆等攻汀州府推官王得仁與知府劉能擊敗
之禽政景等八十四人都指揮馬雄得通賊者姓名將按籍行
戮得仁力請焚其籍賊復寇寧化得仁帥兵往援斬首甚眾賊
退屯將樂得仁將追滅之俄邁疾眾欲輿歸就醫得仁不可曰
吾一動賊必長驅乃起坐帳中諭將吏戮力平賊遂卒賊黨
林拾得掠建寧張瑛與從父敬禦之賊敗乘勝逐北陷伏中敬
死瑛被執大罵而死賊逼泉州知州熊尙初與晉江主簿史孟

常陰陽誦術楊仕宏拒於古陵坡兵敗皆死 初浙閩盜所在
剽掠爲民患將帥率玩寇數被詰責都指揮鄧安等因歸咎於
柳華福建三司言賊初起按臣柴文顯匿不奏釀成今患浙江
巡按御史黃英亦具白汪澄止兵狀王振欲殺朝士威眾遂下
澄文顯吏華已出爲山東副使遣使逮之華聞命仰藥死詔籍
其家男戍邊婦女沒入浣衣局庚子礫文顯亦籍其家澄棄市
宋彰及按察使方冊等十人俱坐斬赦謫驛丞天順初復官
華所建置未爲過澄文顯罪不至死論者冤之 御史張洪等
劾徐恭石璞逗遛無功詔俟師旋以聞 六月庚戌靖州苗犯
辰溪都指揮高諒戰死 丙辰南京謹身奉天華蓋三殿災
大同參將石亨等擊兀良哈盜邊者於箭谿山禽斬五十人三

明紀卷十四

五

衛益怨 甲子詔修省 詔河南山西班軍番休者盡赴大同
宣府 乙丑西寧侯宋瑛總督大同兵馬瑛琥之弟也 己巳
赦天下 戊寅陳懷駙馬都尉井源都督王貴吳克勤太監林
壽分練京軍於大同宣府備瓦剌 南京殿上生荆棘高二尺
秋七月己卯朔癸亥畱守斗侍講徐程私語友人劉溥曰禍
不遠矣亟命妻子南還 瓦剌也先謀入寇脫脫不花止之曰
吾儕服食多資大明何忍爲此也先不聽曰可汗不爲吾當自
爲遂誘脅諸番分道大舉脫脫不花以兀良哈之眾寇遼東知
院何刺寇宣府圍赤城又遣別騎寇甘州也先自寇大同己丑
至貓兒莊參將吳浩戰死羽書踵至太監王振挾帝親征不與
外廷議可否詔下王直帥廷臣力諫曰敵肆猖獗違天悖理陛

下但宜固封疆申號令堅壁清野蓄銳以待之可圖必勝不必親御六師遠臨塞下况秋暑未退旱氣未回青草不豐水泉猶塞士馬之用未充兵凶戰危臣等以爲不可鄺莖言也先入犯一邊將足制之陛下爲宗廟社稷主奈何不自重刑科給事中曹凱言今日之勢大異澶淵彼文武忠勇士馬勁悍今中貴竊權人心玩愒此輩不惟以陛下爲孤注卽懷愍徽欽亦何暇卹兵部侍郎于謙亦極諫帝皆不聽曹鼐問前欽天監正皇甫仲和曰駕可止乎胡王兩尙書已帥百官諫矣曰不能也紫微垣諸星已動矣曰然則奈何曰盍先治內曰將令親王監國曰不如立儲君曰皇子幼未易立也曰恐終不免立癸巳命鄺王居守是日西寧侯宋瑛武進伯朱冕與敵戰於陽和敗沒石亨單

明紀卷十四

夫

騎奔還冕榮之子也甲午帝發京師備文武百官以行乙未次龍虎臺軍中夜驚丁酉次居庸關副都御史鄧榮疏請回鑾以兵事專屬大將辛丑次宣府大風雨埜及榮等又屢言之振益虓怒朱勇等白事咸膝行進埜與王佐跪草中至暮不得請彭德清言天象示警若前恐危乘輿振聾曰爾何知若有此亦天命也鼐曰臣子固不足惜主上繫天下安危豈可輕進振終不從令佐埜皆隨大營埜墜馬幾殆或勸畱懷來城就醫埜曰至尊在行敢託疾自便乎丙午次陽和八月戊申朔次大同振益欲北鎮守太監郭敬以敵勢告振始懼議旋師已西廣寧伯劉安爲總兵官鎮大同錦衣衛指揮郭登爲都督僉事充參將佐之安榮之子登英之孫也庚戌師還登言于鼐曰自此趨紫荆

關裁四十餘里駕宜從此入振欲邀帝至蔚州幸其第既恐蹂其鄉禾稼復折而東軍士迂回奔走丁巳次宣府恭順侯吳克忠與其弟都督克勤爲後拒庚申瓦刺兵突至驟戰不勝敵據山上飛矢石如雨官軍死傷略盡克忠下馬射矢竭猶殺數人與克勤俱沒於陳成國公朱勇永順伯薛綬帥五萬騎還救至鷓兒嶺遇伏一軍盡覆綬驍勇善戰矢盡絃斷猶持空弓擊敵敵怒支解之既而知其本蒙古人也曰此吾同類宜勇健若此相與哭之桎上章請疾驅入關嚴兵爲殿不報又詣行殿申請振怒曰腐儒安知兵事再言者死桎曰我爲社稷生靈言何懼振益怒叱左右扶出辛酉次土木諸臣議入保懷來振顧輜重遽止瓦刺兵大至遂被圍土木地高掘井二丈不得水汲道爲

明紀卷十四

敵所據眾渴敵騎益增壬戌敵見大軍止不行陽卻遣使通和帝召鼐草詔答之振遽令移營就水軍方動也先集騎四面衝之士卒爭先走行列亂敵跳陳而入師大潰死者數十萬人英國公張輔泰寧侯陳瀛駙馬都尉井源平鄉伯陳懷襄城伯李珍遂安伯陳墳修武伯沈榮都督梁成王貴尚書王佐鄺埜學士曹鼐張益侍郎丁鉉王永和副都御史鄧榮通政龔全安少卿黃養正戴慶祖王一居劉容凌壽給事中包良佐姚銑鮑輝御史張洪黃裳魏貞夏誠申祐尹茲童存德孫慶林祥鳳郎中齊汪馮學明員外郎王健程思溫程式遂端主事俞鑑張瑋鄭瑄中書舍人俞拱潘澄錢昂大理寺副馬豫行人司正尹昌行人羅如鼎夏官正劉信序班李恭石玉錦衣衛指揮使錢欽及

弟鍾俱死其餘不可勝數瀛珪之曾孫珍隆之子瑱志之曾孫榮清之子也方敗或語榮曰吾輩可自脫榮曰鑾輿失所我尙何歸遂死帝突圍不得出敵騎擁以去振爲亂兵所殺中官喜盛跛兒干皆降敵顧興祖彭德清等皆遁歸下獄論斬也先聞車駕至錯愕未之信及見致禮甚恭奉帝居其弟伯顏帖木兒營以先所掠校尉袁彬來侍脫脫不花至廣寧王翱方閱兵衆潰翱入城自保或謂城不可守翱手劍曰敢言棄城者斬寇尋退其犯肅州者任禮遣裨將禦之再戰再敗失士馬萬計

甲子京師聞變羣臣聚哭於朝郕王使太監金英興安等問計徐瑄曰驗之星象稽之曆數天命已去惟南遷可以紓難于謙厲聲曰言南遷者可斬也京師天下根本一動則大事去矣獨

明紀卷十四

文

不見宋南渡事乎胡濙曰文皇定陵寢於此示子孫以不拔之計也陳循亦持不可英安遂叱理令扶出理踉蹌過左掖門江淵入迎問之理曰以吾議南遷不合也淵遂入極陳固守之策英安入告太后勸郕王任子謙治戰守議乃定乙丑皇太后命郕王監國時京師勁甲精騎皆陷沒所餘疲卒不及十萬人上下無固志丙寅檄兩京河南備操軍山東及南京沿海備倭軍江北及北京諸府運糧軍亟赴京師從子謙請也或欲焚通州倉絕寇資周忱議事在京曰倉米數百萬可充京軍一歲饟令自往取則立盡何至遂付煨燼從之 時人情恟懼赤城鵬鵠懷來永寧保安諸守將皆棄城遁有議棄宣府城者官吏軍民紛紛爭出羅亨信仗劍坐城下令曰出城者斬與楊洪誓死固

守郭登在大同亦修城堞繕兵械拊循士卒弔死問傷親爲裹創傅藥曰吾誓與此城共存亡不令諸君獨死也也先欲謀逆會大雷雨震死其所乘馬乃擁帝北行道宣府傳命啟門亨信登城語曰奉命守城不敢擅啟也先乃擁帝去戊辰至大同使袁彬入城索金幣登閉城門以飛橋取彬入劉安及侍郎沈固給事中孫祥知府霍瑄等出謁伏地慟哭以金二萬餘及宋瑛朱冕郭敬家資進帝以賜也先等是夕敵營城西登謀遣壯士劫營迎駕不果安邑瞽者全寅學京房術居大同占禍福多奇中帝使問還期筮得乾之初曰大吉四爲初之應初潛四躍明年歲在午其于庚午躍候也庚更新也龍歲一躍秋潛秋躍明年仲秋駕必復但繇勿用應在淵還而復必失位然象龍也數

明紀卷十四

九

九也四近五躍近飛龍在丑丑曰赤奮若復在午午色赤奮於丑若順也天順之也其於丁象大明也位於南方火也寅其生午其壬壬其合也至歲丁丑月寅日午合於壬帝其復辟乎己而悉驗 于謙爲兵部尚書時上下皆倚重謙謙亦毅然以社稷安危爲己任當軍馬控總變在俄頃謙目視指屈口具章奏悉合機宜僚吏受成相顧駭服號令明審雖勳臣宿將小不中律卽請旨切責片紙行萬里外靡不惕息 令羣臣直言時事舉人材 己巳皇太后命立皇長子見濬爲皇太子 追封張輔定興王諡忠烈宋瑛鄆國公諡忠順吳克忠邠國公諡忠勇陳瀛寧國公諡恭愍朱冕陳懷等並贈侯冕諡忠愍懷諡忠毅薛綬諡武毅李珍悼僖陳埴榮懷贈吳克勤昭化伯諡僖敏曹

龔少傅諡文襄張益學士諡文僖鄭瑩王佐皆少保丁鉉王永和尙書鄧榮右都御史餘贈卹有差 庚午陳鎰合大臣廷奏王振罪讀彈文未起王使出待命眾皆伏地哭叫號莫辨人聲長史儀銘造膝前免冠數奏請下令旨族振馬順厲聲叱言者去給事中王竑憤怒奮臂起摔順髮呼曰若曹奸黨罪當誅今尙敢爾且罵且齧其面眾其擊之立斃朝班大亂衛卒聲洶洶王懼遽起欲入竑帥羣臣隨王後于謙排眾直前掖王止使金英問眾所欲言皆曰內官毛貴王長隨亦振黨請置諸法王命出二人眾又捶殺之血漬庭陛縛王山至磔之時百官皆跣躄不寧謙啟王宣諭曰順等罪當死勿論眾乃定謙袍袖爲之盡裂退出左掖門王直執謙手歎曰國家正賴公耳今日雖百王

明紀卷十四

干

直何能爲王召諸言官慰諭甚至籍振家得金銀六十餘庫玉盤百珊瑚高六七尺者三十餘株他珍玩無算 辛未帝至威寧海子 右都御史陳鎰撫安畿內軍民 壬申都督石亨總京營兵皆以于謙薦也 甲戌帝至黑河 乙亥諭邊將瓦剌奉駕至不得輕出 輸南京軍器於京師 修撰商輅彭時入閣預機務時聞繼母憂力辭不允乃拜命釋褐逾年參大政前此未有也 封楊洪昌平伯石亨武清伯 南京侍講學士周敘言君父之讐不共戴天殿下宜卧薪嘗膽如越之報吳使智者獻謀勇者效力務掃北庭雪國恥先遣辯士卑詞重幣乞還鑾輿暫爲君父屈因條上勵剛明親經史修軍政選賢才安民心廣言路謹微漸修庶政八事王嘉納之 廣東賊黃蕭養作

亂 初大臣憂國無主太子方幼寇且至請皇太后立廊王
驚謝至再于謙颺言曰臣等誠憂國家非爲私計王乃受命九
月癸未卽位遙尊帝爲太上皇帝以明年爲景泰元年大赦天
下免景泰二年田租十之三謙入對慷慨泣奏曰寇得志要留
大駕勢必輕中國長驅而南請飭諸邊守臣協力防邊京營兵
械且盡宜亟分道募民兵令工部繕器甲遣都督孫鏗衛穎張
軌張儀雷通分兵守九門要地列營郭外都御史楊善給事中
王竑參之徒附郭居民入城通州積糧令官軍自詣關支以贏
米爲之直毋棄以資敵文臣如軒輊者宜用爲巡撫武臣如石
亨楊洪柳溥者宜用爲將帥至軍旅之事臣身當之不效則治
臣罪帝深納之 甲申夷王振族郭敬亦坐誅彭德清瘐死命

明紀卷十四

三

戮其屍 庚寅處州賊平 癸巳指揮僉事季鐸奉皇太后命
達於上皇寄禦寒裘皇后傾中宮賞佐迎駕夜哀泣籲天倦卽
卧地損一股以哭泣復損一目 劉安馳至京師言奉上皇命
來告敵情且言進已爲侯羣臣交劾下獄論死 也先欲以妹
妻上皇雲南鹽課提舉司吏目胡仲倫言今日事不可屈者有
七降萬乘之尊與諸婚媾一也敵假和議使我無備二也必欲
爲姻驕尊自大三也索金帛使我坐困四也以送駕爲名乘機
入犯五也逼上皇手詔誘取邊城六也欲求山後之地七也稍
從其一大事去矣曩上皇在位王振專權忠諫者死鯁直者成
君子見斥小人驟遷章奏多決中旨黑白混淆邪正倒置閩浙
之寇方殷瓦剌之釁大作陛下宜親賢遠奸信賞必罰通上情

達下志賣國之奸無所投隙倉卒之變末由發機朝廷自此尊
天下自此安矣帝嘉納焉也先令上皇爲書遺楊洪洪封上
之帝馳使報曰上皇書僞也自今雖眞書毋受於是洪一意堅
守甲午祭宣府土木陳亡將士瘞遺骸乙未黃蕭養寇廣
州總兵官安鄉伯張安帥舟師遇賊於感船澳安方醉卧官軍
不能支退至沙角尾賊薄之軍潰安溺死指揮僉事王清被執
死之辛丑給事中孫祥郎中羅通爲右副都御史守紫荆居
庸關甲辰遣御史白圭編修楊鼎等十五人募兵畿內山東
山西河南都督同知陳友帥師討湖廣貴州叛苗乙巳遣
使奉書上皇王驥等自麓川還軍無紀律苗襲其後官軍大
敗貴州巡按御史黃鎬赴平越遇賊幾死夜跳入城賊圍之議

明紀卷十四

三

者欲棄城走鎬曰平越貴州咽喉無平越是無貴州也乃偕諸
將固守苗韋同烈等叛新添清平興隆諸衛並被圍貴州東路
閉丙午調雲南四川兵會王驥討苗初廣東左參議楊信民
清操絕俗嘗行田野訪利弊爲更置先後劾按察使郭智黃翰
僉事韋廣遂爲廣所訐被逮已而得白于謙薦之命守備白羊
口會黃蕭養圍廣州急嶺南人乞信民乃以爲右僉都御史巡
撫其地土民間而相慶曰楊公來矣巡撫山西副都御史朱
鑑言也先奸詭百端殺掠無已復假和親遣使覘伺以送駕爲
名覲得開關延接稍示抗拒彼卽有辭其謀旣深我慮宜遠宜
暫罷中官監軍之制假總兵以生殺權使志無所撓計有所施
整散兵募勇士重懸賞格鼓勵義旅徵勤王兵數道並進戮力

復讐庶大駕可還敵兵自沮襄者江南寇發皆以誅王振爲名
夫事歸朝廷則治歸宦官則亂昔高皇帝與羣臣議事必屏去
左右恐泄事機乞杜權倖之門凡軍國重事屬任大臣必富有
濟時臨洮府同知田暘聽選知縣單宇舉人段堅工部辦事吏
徐鎮俱上言請召還監軍鎮守中官帝皆不納也先詭稱奉
上皇還冬十月戊申至大同都察院歷事監生練剛言和議不
可就南遷不可從有持此議者宜立誅安危所倚唯于謙石亨
當主中軍而分遣大臣守九門擇親王忠孝著聞者合同守臣
勤王檄陝西守將調番兵入衛帝悉從之壬子詔諸王勤王乙
卯于謙提督諸營石亨及諸將分守九門釋顧興祖劉安於
獄起王通爲都督僉事與楊善王竑督京城守備給事中葉盛

明紀卷十四

三

請罷內府軍匠備征操又請令有司儲糧料給戰士遣散卒取
軍器於天津以張外援三日間章七八上也先逼紫荊關都指
揮韓青戰死都御史孫祥堅守丙辰也先由間道入夾攻之關
破祥督兵巷戰兵潰死之通政使謝澤守白羊口或請避敵不
可亦死之京師戒嚴朝士多遣家南徙檢討李紹曰主辱臣死
奚以家爲卒不遣丁巳詔宣府遼東總兵官山東河南山西陝
西巡撫及募兵御史將兵入援石亨議斂兵堅壁以老敵于謙
不可口奈何示弱使敵益輕我亟分遣諸將帥師二十二萬列
陳九門外都督陶瑾安定門劉安東直門武進伯朱瑛朝陽門
都督劉聚西直門顧興祖阜成門都指揮李端正陽門都督劉
得新崇文門都指揮湯節宣武門而謙自與亨帥副總兵范廣

武興陳德勝門外當敵衝以部事付侍郎吳寧悉閉諸城門身自督戰下令臨陳將不顧軍先退者斬其將軍不顧將先退者後隊斬前隊於是將士知必死皆用命議者欲焚城外馬草給事中李侃言敵輕剽無持久心乞勿焚免復斂爲民害報許百姓避兵者號城下求入兵部侍郎鄒幹開門納之戊午也先薄都城都督高禮毛福壽敗之西直門北禽其長一人帝喜令謙選精兵屯教場以便調用復命太監興安李永昌同謙理軍務己未也先奉上皇登土城邀大臣出迓中書舍人趙榮慨然請行高穀拊其背曰子忠義人也解所佩犀帶贈之卽擢太常少卿偕右通政王復出城朝見進羊酒諸物也先以非大臣遣之還而邀謙亨王直胡濙出帝不遣庚申徵兵於朝鮮調河州諸衛土軍入援也先窺德勝門謙令亨設伏空舍遣數騎誘敵敵以萬騎來薄范廣發火器伏起齊擊之廣躍馬陷陳部下從之勇氣百倍也先弟孛羅平章卯那孩中礮死敵轉至西直門都督孫鏜禦之不勝鏜欲入城給事中程信不納從城上發箭礮助之鏜戰益力斬其前鋒數人寇稍卻鏜逐之寇益兵圍鏜鏜力戰不解高禮毛福壽來援禮中流矢死會亨分兵至寇乃卻辛酉武興擊敵西直門與都督王敬陞其前鋒寇且卻而內官數百騎欲爭功躍馬競前陳亂興被流矢死寇遂至土城居民升屋號呼投甌石擊寇譁聲動天王竑及福壽援至寇復卻初也先深入視京城可旦夕下及旦官軍嚴陳待邀請皆不應戰又連敗意大沮聞勤王兵且至玩斷歸路壬戌擁上皇由良鄉

西去謙調諸將追擊詔進亨爵爲侯加謙少保總督軍務謙固辭曰四郊多壘敢邀功賞哉不允謙請益兵守保定涿易諸府州以大臣鎮山西防寇南侵甲子也先擁上皇出紫荆關其別部攻居庸關羅通汲水灌城冰堅不得近亦遁走通追擊破之丁卯詔止勤王兵脫脫不花使來楊洪將兵二萬至辛未命充總兵官鏜廣副之勦畿內餘寇洪至霸州破敵獲阿歸等四十八人還所掠人畜萬計及關寇返鬪殺官軍數百人洪子俊幾爲所及襄陵王冲炆赴京師勤王下書慰勞時畿民猶日數驚相率南徙或議仍召勤王兵吳寧曰是益之使驚也莫若告捷四方人心自定因具奏行之贈劉球翰林院學士諡忠愍立祠於鄉侍講劉定之言自古如晉懷愍宋徽欽皆因邊塞

明紀卷十四

五

外破藩鎮內潰救援不集馴致播遷未有若今日以天下之大數十萬之師奉上皇於漠北委以與寇者也晉宋遭禍亂棄故土偏安一隅尙能奮於旣衰以禦方張之敵未有若今日也先乘勝直抵都城以師武臣力之眾旣不能奮武以破賊又不能約和以迎駕聽其自來而自去者也國勢之弱雖非旦夕所能強豈可不思自強之術而力行之臣敢略陳所見近日京軍之戰但知堅壁持重而不能用奇制勝至前敗而後不救左出而右不隨謂宜倣宋吳玠吳璘三疊陳法互相倚恃迭爲救護至鐵騎衝突必資刀斧以制之郭子儀破安祿山八萬騎用千人執長刀如牆而進韓世忠破兀朮拐子馬用五百人執長斧上搥人胷下斫馬足是刀斧揮霍便捷優於火鎗也紫荆居庸二

關名爲關塞實則坦途今宜增兵士繕亭障塞蹊隧陸則縱橫掘塹名曰地網水則瀦泉合深名曰水櫃或多植榆柳以制奔突或多招鄉勇以助官軍此皆古所嘗爲己有明效往者奉使之臣充以驛人駟夫招釁啟戎職此之故今宜擇內蘊忠悃外工專對若陸賈富弼其人者使備正介之選庶不失辭辱國臣於上皇朝乞徙漠北降人智謀短淺未蒙採納比乘國釁奔歸故土寇掠畿甸者屢見告矣宜乘大兵聚集時遷之南方使與中國兵民相錯雜以牽制而變化之且可省俸給減漕輓其事甚便天下農出粟女出布以養兵也兵受粟於倉受布於庫以衛國也向者兵士受粟布於公門納月錢於私室於是手不習擊刺之法足不習進退之宜第轉貨爲商執技爲工而以工商

明紀卷十四

美

所得補納月錢民之膏血兵之氣力皆變爲金銀以惠奸宄一巨帥以臨敵如驅羊拒狼幾何其不敗也今宜痛革其弊一新簡練之政將帥踵舊習者誅無赦如是而兵威不振者未之有也守令朘民猶將帥之剝兵也宜嚴糾考慎黜陟犯賊者舉主與其罰然後貧墨者寡薦舉者慎民安而邦本固矣古販繒屠狗之夫俱足助成帝業今于謙楊善亦非出自將門夫將能知將宜令各舉所知不限門閥公卿侍從亦合舉勇力智謀之士以備將材庶搜羅旣廣禦侮有人昔者漢圖恢復所恃者諸葛亮南宋禦金所恃者張浚彼皆忠義夙著功業久立及街亭一敗亮辭丞相符離未捷浚解都督何則賞罰明則將士奮也昨德勝門下之戰未聞推陷強寇但迭爲勝負互殺傷而已雖不

足罰亦不足賞乃石亨則自伯進侯于謙則自一品遷一品天下未聞其功但見其賞豈不怠忠臣義士之心乎可令仍循舊秩勿躡新階他日勳名著而爵賞加正未爲晚夫旣與不忍奪者姑息之政旣進不肯退者患失之心上不行姑息政下不懷患失心則治平可計日而望也向者御史建白欲令大臣入內議政疏寢不行夫人主當總攬威權親決機務政事早朝未決者日御便殿使大臣敷奏言官察其邪正而糾劾之史官直書簡冊以示勸懲此前代故事祖宗成法也願陛下遵而行之若僅封章入奏中旨外傳恐偏聽獨任致生奸亂欲治化之成難矣人主之德欲其明如日月以察直枉仁如天地以覆羣生勇如雷霆以收威柄故司馬光之告君以明仁武爲言卽中庸所

明紀卷十四

毛

謂智仁勇也智仁勇非學而能之哉經莫要於尚書春秋史莫正於通鑑綱目陛下留心垂覽其於君也旣知禹湯文武之所以興又知桀紂幽厲之所以替而趨避審矣於馭內臣也旣知有呂強張承業之忠又知有仇士良陳弘志之惡於馭廷臣也旣知有蕭曹房杜之良又知有李林甫楊國忠之奸而用舍當矣如是則於智仁勇之德豈不大有助哉苟徒如向者詞臣進講誦述其善諱避其惡是猶恐道路之有陷穽閉目而過之其不至於冥行顛仆者幾何今天下雖遭大創尙如金甌之未缺誠能本聖學以見之政治臣見國勢可強讐恥可雪兄弟之恩可全祖宗之制可復亦何憚而不爲此書奏帝優詔答之 十一月癸未修沿邊關隘 辛卯毛福壽爲副總兵討辰州叛苗

擢克羅俄領占都督僉事帥部隨福壽援勦初永樂中降人安
置近畿者甚眾也先入寇多爲內應于謙謀散遣之因西南用
兵輒選其精騎厚資以往己更遣其妻子克羅俄領占喃哥之
弟也壬辰上皇至瓦刺自土木敗袁彬隨侍上皇不離左右
也先犯大同宣府逼京師皆奉上皇以行上下山坂涉溪澗冒
危險彬擁護不少懈旣入沙漠上皇所居止毳帳敝幃旁列一
車一馬以備轉徙彬周旋患難未嘗違忤夜則與上皇同寢天
寒甚恒以脅溫上皇足也先惡彬一日縛至曠野將支解之上
皇聞如失左右手急趨救乃免彬嘗中寒上皇憂甚以身壓其
背汗浹而愈有通事哈銘者亦侍上皇上皇宣諭也先及其部
下嘗使銘也先輩有所陳請亦銘爲轉達上皇獨居悒鬱彬及

明紀卷十四

天

銘時進諧語慰上皇上皇爲解顏忠勇伯蔣信陷敵隸賽罕王
帳下時詣上皇所慟哭擁衛頗至也先嘗夜過御幄遙見赤光
奕奕若龍蟠大驚異又欲進其妹上皇卻之益敬服時殺羊
馬置酒爲壽稽首行君臣禮鳳陽歲凶盜且起乙未命刑部
侍郎耿九疇往巡視撫安流民賜復三年九疇旣至奏留英武
飛熊諸衛軍耕守招徠流民七萬戶境內遂安進陳豫楊洪
爵爲侯金濂爲戶部尙書時四方用兵需饟急濂議上擲節
便宜十六事國用得無乏陳循等議召還羅通雷楊洪寧京
營葉盛言今日之事邊關爲急往者獨石馬營不棄駕何以陷
土木紫荆白羊不破寇何以薄都城今紫荆倒馬諸關寇退幾
及一月尙未設守禦宣府爲大同應援居庸切近京師守之尤

不可非人洪等既畱必求如洪者代之然後可以副重寄而集大功帝是之尋命盛出安集陳州流民 都督朱謙鎮宣府
僉都御史王竑鎮居庸關竑至簡士馬繕阨塞劾將帥不職者
壁壘一新 十二月庚戌尊皇太后爲上聖皇太后 辛亥王
驥爲平蠻將軍充總兵官討貴州叛苗 都督同知董興爲左
副總兵討廣東賊戶部侍郎孟鑑參贊軍務興以天文生馬軾
自隨果銳不能戢下軾戒之 癸丑尊母賢妃吳氏爲皇太后
甲寅立妃汪氏爲皇后丙辰大赦 己未石亨楊洪柳溥分練
京營兵朝廷以洪宿將所言多采納洪陳禦寇三策又奏請簡
汰三千諸營將校不得以貧弱充伍從之 戊辰祭陳亡官軍
於西直門外

明紀卷十四

无

明紀卷第十五

暹王出身不審事虞衡廷鸞養嗣贈府銜鑾騎世職閣僚補中書孫家參訂

景帝紀一

一起景泰元年庚午訖景泰三年壬申凡三年

恭仁康定景皇帝景泰元年春正月丁丑朔罷朝賀 陳豫鎮臨清議建城堡檄發役夫萊州知府崔恭以方春民乏食請俟秋成 始令納粟納馬者給冠帶 辛巳築城天壽山南駐陵軍命曰永安 福建賊破清流縣 羅通言諸邊報警率由守將畏微調飾詐以惑朝廷遇賊數十輒稱殺賊數千向者德勝等門外不知斬馘幾何而獲官者至六萬六千餘人輦下且然何況塞外且韓信起自行伍穰苴拔於寒微宜博搜將士中如信直者與議軍事若今腰玉珥貂皆苟全性命保爵祿之人憎

明紀卷十五

一

賢忌才能言而不能行未足與議也于謙言槩責邊報不實果有警不奏必致誤事德勝門外官軍升級惟武清侯石亨功次冊當先者萬九千八百餘人及陳亡三千餘人而已安所得六萬之多通以爲濫宜將臣及亨等陞爵削奪有如韓信穰苴者乞卽命指薦并罷臣營務專治部事疏下廷議廷臣共言謙及石亨楊洪實堪其任又謂通志在滅賊無他帝兩解之尋救謙錄功不得如從前冒濫蓋因通言而發也人由是不直通 閏月甲寅瓦剌寇寧夏 先是會試取士分南北中卷癸亥詔依永樂間例毋拘額從大理寺丞李奎請也 瓦剌騎數千自順聖川入營沙窩庚午郭登帥兵擊敗之又追敗之榜棧山斬二百餘級得所掠人畜八百有奇自土木敗後邊將畏縮無敢與

寇戰登以八百人破敵數千騎軍氣大振丙午封登定襄伯
免大名真定開封衛輝被災稅糧 彭時以兵事稍息得請終
制然由是忤旨 召王文掌院事文深刻有城府中柔媚而面
目嚴冷與陳鑑同官一揖外未嘗接談諸御史畏之若神 刑
部侍郎耿九疇理兩淮鹽課巡撫浙江都御史軒輶兼理兩浙
鹽課 二月戊寅耕藉田 塞上軍民多爲寇所掠癸未羅通
請榜諸邊能自歸者軍免戍守三年民復徭役終身又請懸封
爵重賞募能禽斬也先伯顏帖木兒喜盜者已又言古之將帥
務搜拔眾才如知山川形勢者可使導軍能騰高越險者可使
覘敵能風角鳥占者可使備變今軍中未見其人乞救廷臣各
舉所知命總兵官楊洪副將孫鏗同臣考驗詔行之 丙戌石

明紀卷十五

二

亨爲鎮朔大將軍帥京軍三萬人巡天同都指揮同知楊能充
遊擊將軍帥萬五千人巡宣府能洪之從子也 都督衛穎統
大營范廣協理 喜盜之降敵也爲之謀主也先嘗謂上皇曰
中朝若遣使來皇帝歸矣上皇曰汝自送我則可欲中朝遣使
徒費往返爾盜聞怒曰欲急歸者袁彬也必殺之盜勸也先西
犯塞夏掠其馬直趨江表居上皇南京彬與哈銘謂上皇曰天
寒道遠陛下又不能騎空取凍飢且至彼而諸將不納奈何上
皇止盜盜欲殺二人皆上皇力解而止盜數爲也先畫策索賞
賜導入邊寇掠上皇患之言於也先使盜還京索禮物而命彬
以密書報邊臣至獨石都指揮江福禽之送京師壬辰磔於市
董興師至廣州賊舟千餘艘勢甚熾而徵兵未至諸將請濟

師馬軾曰廣民延頸久矣卽以狼兵往擊猶拉朽耳興從之初廣州被圍久將士戰輒敗禁民出入樵采絕鄉民避賊者又拒不納多爲賊所害民益歸賊楊信民至開城門發倉廩刻木鍬給民得出入賊見木鍬曰此楊公所給也不敢傷避賊者悉收保民若更生信民益厲甲兵多方招撫降者日至乃使使持檄入賊營諭以恩信黃蕭養曰得楊公一言死不恨尅日請見信民單車詣之隔濠與語賊黨望見謹曰果楊公也爭羅拜有泣下者賊以大魚獻信民受之不疑蕭養且降而大軍至賊遂中變三月己酉有大星隕城外七日而信民暴疾卒軍民聚哭城中皆編素賊聞之亦泣曰楊公死吾屬無歸路矣 氏刺寇朔州 辛亥錄土木死事諸臣後鄺莖子儀王佐子道俱戶部主

明紀卷十五

三

事曹爾子恩丁鉉子琥王永和子汝賢鄧榮子瑞俱大理評事餘俱國子生恩自陳願讀書翰林許之改編修 氏刺寇宣府朱謙告急救兵部會諸營將遴選將材癸丑范廣充總兵官羅通提督軍務禦之已而寇退于謙請令廣等駐兵居庸寇來則出關勦殺退則就糧京師從之 氏刺寇寧夏慶陽乙卯寇朔州 癸亥免畿內逋賦及夏稅 兵部右侍郎俞綱入閣預機務 罷眞定河間採野味直沽造乾魚中官從于謙請也 夏四月丙子廣東都指揮李昇何貴帥兵捕海賊戰死 辛巳氏刺寇大同官軍擊卻之 平越被圍九月掘草根煮弩鎧食之死者相枕籍王驥頓軍辰沅不進黃鑑置密疏竹筒中募土人間行乞援於朝且劾驥等覆師狀丁亥梁瑤爲平蠻將軍方瑛

爲右副總兵代驥討叛苗吏部侍郎何文淵以貴州苗未平議罷二司專設都司以大將鎮之于謙曰不設二司是棄之也議乃寢 戊子大理寺丞李茂錄囚南京考黜百司訪軍民利病大同參將許貴言迤北有三人至鎮欲朝廷遣使議和于謙言前遣指揮季鐸岳謙往而也先隨入寇繼遣通政王復少卿趙榮不見上皇而還和不足恃明矣况我與彼不共戴天理固不可和萬一和而彼肆無厭之求從之則坐敝不從則生變勢亦不得和貴爲介冑臣而懼怯如此何以敵愾法當誅移檄切責貴成之子也 丙申瓦剌寇雁門都指揮李端擊卻之 丁

酉瓦剌入石峰口燒關門而去 己亥都督同知劉安充總兵

官練兵保定真定涿易通諸處僉都御史陳泰參贊軍務 庚

明紀卷十五

四

子振山東饑 辛丑振畿內被寇州縣 癸丑瓦剌數千騎至

大同郭登出東門戰僞北誘之入土城伏起敵敗走登度敵且復至令軍士齎毒酒羊豕楮錢僞爲祭冢者見寇卽棄走寇至爭飲食之死者甚眾 浙江鎮守中官李德言馬順等有罪當請命行誅諸臣乃敢擅殺非有內官擁護危矣是皆犯闕賊臣不宜用章下廷議于謙言上皇蒙塵禍由賊振順等實其腹心陛下監國羣臣共請行戮而順猶敢呵叱在廷文武忠憤激發不暇顧忌捶死三人此正春秋誅亂賊之大義也向使乘輿播遷奸黨猶在國之安危殆未可知臣等以爲不足問帝曰誅亂臣所以安眾志廷臣忠義朕已知之卿等勿以德言介意 五 月乙巳免山西被災稅糧 召羅通范廣還 楊洪子俊爲宣

府右參將恃勢橫恣以私憾杖都指揮陶忠至死洪懼奏俊輕
躁恐誤邊事乞令來京隨臣操練許之既至言官交劾下獄論
斬詔令隨洪立功喜寧之禽也俊冒其功未幾事覺乃更貶俊
官別賞江福等 瓦剌掠河曲及義井堡殺二指揮圍忻代諸
州石亨等不能禦長驅抵太原城北山西大震詔朱鑑移鎮雁
門而別遣都督僉事王良鎮太原劉安督涿易諸軍赴援兵漸
集敵亦屢乃引去 戊申瓦剌寇雁門益黃花鎮戍兵衛陵寢
游擊將軍石彪敗瓦剌於威遠衛彪亨之從子也 瓦剌入

宣府朱謙禦之關子口寇數千騎突至謙拒以鹿角發火器擊
之寇少卻如是數四謙軍且退都督江福援之亦失利謙復力
戰寇不得入 廣東兵大集癸丑董興進至大洲擊賊殺溺死

明紀卷十五

五

者萬餘人餘多就撫黃蕭養中流矢死函首以獻俘其父及子
等餘黨皆伏誅興兵所過村聚多殺掠民仰天號曰楊公在豈
使吾曹至是請於朝建祠祀焉興畱鎮廣東 浙江賊陶得二
復熾擁眾犯武義先遣其黨十餘輩偽爲鄉民避賊者以敝緼
裹薪鬪入城賊至副使陶成出戰賊黨持薪縱火官軍驚潰成
與都指揮僉事崔源皆戰死成數有功事聞贈左參政錄其子
魯爲八品官 瓦剌數出沒大同渾源伺軍民樵采輒驅掠或
幸脫歸率殘傷肢體遺民相率入城無所棲又乏食霍瑾以聞
壬戌命老弱聽暫徒發粟振之除城守丁壯賦役 貴州副總
兵田禮擊叛苗走之平越新添圍並解總督軍務侍郎侯璉遣
兵攻敗都盧水西諸賊貴州道始通又調雲南兵由烏撒會師

開畢節諸路檄普安土兵援安南衛而自帥師攻紫塘彌勒等十餘寨會賊復圍平越回師擊退之遂分哨七盤坡羊腸河楊老堡解清平圍東至重安江與王驥會驥亦俘剗平王蟲富自興隆抵鎮遠道皆通 辛未瓦剌也先遣使請和且請還上皇下禮部議未決王直帥羣臣上言曰太上皇惑細人言輕身一出至於蒙塵陛下宵衣旰食徵天下兵與羣臣兆姓同心僇力期滅此朝食以雪不共戴天之恥迺者天誘其衷也先有悔心之萌而來求成於我請還乘輿此轉禍爲福之機也望陛下俯從其請遣使往報因察其誠僞而撫納之奉太上皇以歸少慰祖宗之心陛下天位已定太上皇還不復泣天下事陛下第崇奉之則天倫厚而天眷益隆誠古今盛事也帝曰卿等言良然

明紀卷十五

六

但前後使者五輩往終不得要領今復遣使設彼假送駕爲名來犯京師豈不爲蒼生患賊詐難信其更議之 俞綱解閣務守本官 六月壬午瓦剌二千騎寇大同郭登擊卻之丙戌也先復奉上皇至城外聲言送駕還登與同守者設計具朝服候駕月城內伏兵城上俟上皇入卽下月城開也先及門而覺遂擁上皇去 金英家人犯法王文陳鎰治之不罪英給事中林聰等劾文鎰畏勢縱奸并及御史宋璪謝琚丁亥下文等錦衣衛獄文等引罪釋之聰言璪琚不任風紀命調外 戊子瓦剌二千騎寇宣府朱謙遣都指揮牛壘等往禦戰南坡謙見塵起帥參將紀廣等馳援自己至午寇敗遁初也先欲取大同爲巢穴又謂大同宣府二城旦夕可下數來攻而郭登守大同謙守

宣府數挫其眾有一營數十人不還者喜寧既死叛人小田兒爲敵間會侍郎王偉出視邊于謙授計誘誅之又請特釋蔣信家許以封爵俾陰爲之計脫脫不花阿剌皆撤所部歸也先始決意歸上皇 戊戌免山東被災州縣稅糧 于謙以山西近寇請遣大臣往鎮楊洪亦乞遣重臣從雁門護饟大司馬以命羅通通不欲行請得與謙洪俱謙遂請往帝不允卒命通 瓦剌阿剌使復至胡濙等復請遣迎上皇帝御文華殿門召諸大臣及言官諭以宜絕狀王直對曰必遣使毋貽後悔帝不悅曰朕本不欲登大位當時見推實出卿等于謙曰天位已定寧復有他顧理當速奉迎耳萬一彼果懷詐我有辭矣帝顧而改容曰從汝從汝羣臣退興安匍匐出呼曰若等固欲遣使有文天

明紀卷十五

七

祥富弼其人乎直大言曰廷臣惟天子使既食其祿敢辭難乎言之再聲色愈厲安語塞己亥給事中李實爲禮部右侍郎大理寺丞羅綺爲右少卿使瓦剌敕書不及迎上皇實走白內閣遇安安詬曰若奉黃紙詔行耳他何預 肅府儀衛司餘丁聊讓言邇歲土木繁興異端盛起番僧絡繹汗吏縱橫相臣不正其非御史不劾其罪上下蒙蔽民生凋瘵狡寇犯邊上皇播越陛下枕戈嘗膽之秋可不拔賢舉能一新政治乎昔宗岳爲將敵國不敢呼名韓范鎮邊西賊聞之破膽司馬居相位強鄰戒勿犯邊今文武大臣之有威名德望者宜使典樞要且延訪智術才能之士布滿朝廷則也先必畏服而上皇可指日還矣大臣陽也宦寺陰也君子陽也小人陰也近日食地震陰盛陽微

謫見天地望陛下總攬乾綱抑宦寺使不得預政遏小人俾不得居位庶陰陽順而天變可弭天下治亂在君心邪正田獵是娛宮室是侈宦寺是狎三者有一足蠱君心願陛下涵養克治多接賢士大夫少親宦官宮妾革奢靡戒游佚堯立謗木恐人不言所以聖秦除諛法恐人議己所以亡望陛下廣從諫之量旌直言之臣則國家利弊閭閻休戚臣下無所顧忌言無不盡也蘇子曰平居無犯顏敢諫之臣則臨難必無仗節死義之士願陛下恒念是言而審察之帝嘉納焉 秋七月庚戌尙書侯璉都督方瑛進克賞改諸砮禽偽苗王王阿同等三十四人別賊阿趙僞稱趙王帥眾掠清平璉等復討禽之水西苗阿忽等六族皆自乞歸化詔璉隨方處置 瓦剌脫脫不花入貢也先

明紀卷十五

八

亦遣使復至將遣歸使者謂館伴曰朝廷遣使報阿剌知院而不遣大臣報可汗及太師事必不濟胡濙以聞廷議簡四人爲正副使與偕行帝命侯李實還議之王直等固請庚申楊善及工部侍郎趙榮都指揮同知王息千戶湯公讓使瓦剌濙等言上皇蒙塵久宜附進服食不報敕書亦無奉迎語自齋賜也先外無他賜善乃出家財悉市彼中所需者攜以往公讓和曾孫也 停山西民運糧大同 癸亥李實羅綺還以也先使俱至具言欲和狀王直與陳懋等上疏請更遣使齋禮幣往迎上皇帝令不須遣使但以迎復意宣示也先直等復言臣等與李實語具得彼中情事其所需衣物資斧者上皇言也而奉迎車駕也先意也昨脫脫不花阿剌使來皆有報今使以迎請爲辭乃

不遣使與偕是疑敵而召兵也實自言於帝帝皆不許也先使辭歸帝賜書諭送回大駕就令楊善奉迎直等復言今北使已發願本上皇之心順臣民之願因彼悔心遣使往報以圖迎復帝命擇使直等請仍遣實命俟善歸再議御史畢鑾等上疏言就令彼以詐來我以誠往萬一不測則我之兵力固在檢討邢讓亦以爲請不許 城臨清陳豫練兵撫民安靜不擾及召還父老詣闕請畱從之 己巳楊善至瓦刺其館伴與飲帳中詔善曰土木之役六師何怯也善曰彼時官軍壯者悉南徵王司禮邀大駕幸其里不爲戰備故令汝得志耳今南徵將士歸可二十萬又募中外材官技擊可三十萬悉教以神鎗火器藥弩中百步外洞人馬腹立死又用策士言緣邊要害隱鐵椎三尺

明紀卷十五

九

馬蹏踐輒穿又刺客林立夜度營幕若猿猴伴色動善曰惜哉今皆置無用矣問何故曰和議成歡好且若兄弟安用此因以所齎遣之其人喜悉以語也先明日見也先又大有所遣也先亦喜善因詰之曰太上皇帝朝太師遣貢使必三千人歲必再賚金幣載途背盟見攻何也也先曰奈何削我馬價子帛多翦裂前後使人往多不歸又減歲賜善曰非削也太師馬歲增價難繼而不忍拒故微損之太師自度價比前孰多帛翦裂者通市爲之事露誅矣即太師貢馬有劣弱貂或敝亦豈太師意耶且使者多至三四千人有爲盜或犯他法歸恐得罪故自亡耳畱若奚爲貢使受宴賜上名或浮其人數朝廷核實而子之所減乃虛數有其人者固不減也也先稱善善復曰太師再攻我

屠戮數十萬太師部曲所傷亦不少矣上天好生太師好殺故數有雷警今還上皇和好故中國金幣日至不亦美乎也先曰敕書何以無奉迎語善曰此欲成太師令名使自爲之若載之敕書是太師迫於朝命非誠心也先大喜問上皇歸將復爲天子乎善曰天位已定難再移也先曰堯舜如何善曰堯讓舜今兄讓弟正相同也其平章昂克問善何不以重寶來購善曰若齋貨來人謂太師圖利今不爾乃見太師仁義爲好男子垂史策頌揚萬世也先笑稱善伯顏帖木兒勸也先畱使臣遣使要上皇復位也先懼失信不可卽日引善見上皇遂設宴餞上皇行也先席地彈琵琶妻妾奉酒顧善曰都御史坐善不敢坐上皇曰太師著坐便坐善承旨坐卽起周旋其間也先顧羨

明紀卷十五

十

曰有禮伯顏帖木兒等亦各設餞八月癸酉也先築土臺坐上皇臺上帥妻妾部長羅拜其下各獻器用食物上皇發瓦刺也先與部眾皆送約半日程也先伯顏帖木兒下馬伏地慟哭曰皇帝行矣何時復得相見良久乃去遣頭目七十人送至京袁彬哈銘蔣信並從駕還山西都司令史賈斌疏言宦官之害引漢桓帝唐文宗宋徽欽爲戒且獻所輯忠義集四卷採史傳所記直諫盡忠節之士而宦官恃寵蠹政可爲鑒戒者附焉報

聞 戊寅祀社稷

庚辰命禮部具奉迎儀胡濙等議禮部迎

於龍虎臺錦衣具法駕迎居庸關百官迎土城外諸將迎教場門上皇自安定門入進東安門於東北上門南面坐皇帝謁見畢百官朝見上皇入南城大內議上傳旨以一轎二馬迎於居

庸至安定門易法駕餘如奏命太常寺少卿許彬奉迎於宣府
給事中劉福李侃等言奉迎禮太薄帝報曰朕尊大兄爲太
上皇帝尊禮無加矣福等顧云太薄其意何居胡濙等言諸臣
意無他欲陛下篤親親耳帝曰昨得太上皇帝書具言迎駕禮
宜從簡朕豈得違之羣臣乃不敢言 千戶龔遂榮爲書投高
穀言奉迎宜厚具言唐肅宗迎上皇故事穀袖之入朝徧示廷
臣曰武夫尙知禮況儒臣乎眾善其言胡濙王直欲以聞王文
阻之乃止葉盛林聰劾穀等股肱大臣有聞必告不宜偶語竊
議有詔索書且詰所從得穀對曰自臣所因抗章請如遂榮言
濙請帝躬迎安定門外分遣大臣迎龍虎臺帝不悅曰第從朕
命無事紛更下遂榮詔獄久之得釋 壬午上皇至宣府朱謙

明紀卷十五

七

出謁命厚犒瓦刺使者癸未命許彬書罪己詔諭羣臣敕遣祭
土木陳亡官軍甲申侍讀商輅奉迎於居庸關丙戌上皇還京
師帝迎於東安門上皇入居南宮帝帥百官朝謁庚寅赦天下
辛卯刑部右侍郎江淵兼翰林學士直文淵閣預機務 進
楊善左都御史 苗衷致仕 總督湖廣貴州軍務兵部尙書
侯璉卒於普定 九月壬寅朔王驥爲南京兵部尙書參贊機
務南畿軍素偷惰驥至以所馭兵軍法教之于謙弗重也朝廷
以其舊臣寵禮之 丁未封朱謙爲撫寧伯 鎮守中官陳公
忌郭登會有發公奸賊者公疑登使之遂與登構帝謂于謙曰
太同吾藩籬公與登如是其何以守遣右監丞馬慶代之公還
登愈感奮 癸丑河南巡撫副都御史王來爲右都御史總督

湖廣貴州軍務討叛苗 南京吏部尙書魏驥祭酒陳敬宗並致仕驥初以請老至京師陳循請閒曰公雖位冢宰未嘗立朝願少待事在循輩驥正色曰君爲輔臣當爲天下進賢才不得私一座主退語人曰渠以朝廷事爲一己事安得善終循驥門生也驥端厚祇慎顧勁直好別白君子小人恆曰無是非之心非人也家居憂國憂民老而彌篤布衣糲食未嘗殖生產敬宗與李時勉同時爲南北祭酒時勉平恕得士敬宗方嚴終明世稱賢祭酒曰南陳北李 初毛忠征瓦剌獲番僧加失領真以獻後逃之瓦剌爲也先用憾忠欲陷之宣言忠數遣使通瓦剌遂發忠福建立功徙其家屬京師 冬十月辛卯錄囚 癸巳免畿內逋賦 耿九疇兼撫鳳陽等處 初楊洪自獨石入衛

明紀卷十五

七

八城悉以委寇于謙使都督孫安以輕騎出龍門關據之且戰且守八城遂復 瓦剌使三千人來朝于謙請列兵居庸關備不虞京師盛陳兵宴之因言和議難恃條上安邊三策請敕大同宣府永平山海遼東各路總兵官增修備禦瓦剌入貢每攜故所掠人口至謙必奏酬其使前後贖還累數百人 李實爲右都御史巡撫湖廣 溫處餘賊尙熾鎮守浙江兵部侍郎孫原貞母喪令視事十一月原貞進兵搗賊巢俘斬賊首陶得二等招撫三千六百餘人追還被掠男女原貞請奔喪踰月還鎮分兵勦平餘寇 金英以罪下獄詞連工部尙書石璞帝命錮英宥璞出理大同軍饑 辛亥胡濙請令百官賀上皇萬壽節十二月丙申復請明年正旦百官朝上皇於延安門皆不許荆

王瞻塙請朝上皇不許 梁珪與王來毛福壽方瑛會兵討叛苗至靖州賊掠長沙寶慶武岡珪等分道邀擊俘斬三千餘人賊遁去已復出掠官軍連戰皆捷

二年春正月壬子考察天下入覲官當黜者運糧口外 御史練綱巡視兩淮鹽政 二月辛巳釋奠於先師孔子 吏部郎

中李賢上正本十策曰勤聖學顧箴警戒愆絕玩好慎舉措崇節儉畏天變勉貴近振士風結民心帝善之命翰林寫置左右備省覽 辛卯以星變修省詔廷臣條議寬卹諸政 癸巳

詔畿內及山東巡撫官舉廉能吏專司勸農授民荒田貸牛種子謙憂國忘身口不言功自奉儉約所居僅蔽風雨帝賜第東華門辭曰國家多難臣子何敢自安固辭不允乃取前後所

明紀卷十五

三

賜璽書袍錠之屬悉加封識歲時一省視而已 撫寧伯朱謙卒 初設漕運總督於淮安以王茲爲之與都督僉事徐恭同理漕事治通州至徐州運河三月江北大饑茲從周忱貸米三萬石忱爲計至來年麥熟以十萬石畀之 也先遣使入貢且請答使王直等言邊備未修芻糧未積瘡痍未復宜如其請遣使往以觀虛實開導其善不許 郭登以老疾乞休舉石彪自代且請令其子嵩宿衛帝以嵩爲散騎舍人不聽登辭登以邊患甫息思得公廉有爲者與俱遂劾奏沈固廢事而薦尚書楊璠布政使年富又言大同既有御史又有巡按御史僉都御史任寧宜止巡撫宣府帝悉從之以富爲右副都御史巡撫大同提督軍務而徵固及任寧還大同經喪敗法弛弊尤甚富一意

拊循奏免秋賦罷諸州縣稅課局停太原民轉輸大同石亨等
令家人領官庫銀帛糴米實邊多所乾沒富首請按治詔有亨
等抵家人罪亨所遣卒越關抵大同富復劾亨專擅亨輸罪乃
已中書舍人何觀劾尙書王直輩正統時阿附權奸不宜在
左右中官見權奸語以爲侵己激帝怒下科道參議吏科毛玉
主奏稿力詆觀林聰葉盛持之乃刪削奏上會御史疏亦上中
有觀考滿不遷私憾吏部語遂下觀詔獄杖之謫九溪衛經歷
梁珪王來自沅州進兵與方瑛破賊於興隆之截洞賊退保
香爐山山陡絕官軍分三道進瑛自龍場毛福壽自重安江都
督陳友自萬潮山來與珪大軍繼之先後破黎樹翁滿等三百
餘寨招撫衮水等三百餘寨會師香爐山下環四面攻之發礮

明紀卷十五

十四

轟崖石聲動地賊懼夏四月乙酉縛同烈并賊將五十八人降
餘悉解散遂移軍清平檄四川兵共勦都勻草塘諸賊賊望風
具牛酒納款賊平班師詔苗來珪鎮撫 陝西饑軍民萬餘人
言願得陳公活我監司以聞帝以命鑑鑰至是凡三鎮陝西先
後十餘年陝西人戴之若父母每還朝必遮道擁車泣再至則
歡迎數百里不絕其得軍民心前後撫陝西者莫及也 甲午
瓦刺寇宣府馬營以報使爲辭敕石彪等巡邊乙未命石亨選
京營兵操練尙書石璞總督軍務 五月王直等復請遣使耶
刺言絕之且起釁帝曰遣使有前事曩瓦刺入寇時豈無使耶
因敕也先日前者使往小人言語短長遂致失好朕今不復遣
而太師請之甚無益直等言陛下銳意治兵爲戰守計真大有

爲之主然使命不通難保其不爲寇宜救治邊守臣發兵游徼有警則入保無事則力耕陛下於機務之暇時召京營總督總兵詢以方略誠接而禮貌之信賞罰以持其後斯戰守可言也帝曰善 監生郭佑言逆寇犯順上皇蒙塵此千古非常之變百世必報之讐也今使臣之來動以數千務驕蹇責望於我而我乃隱忍姑息致賊勢日張我氣日索求和與和求戰與戰是和戰之權不在我而在賊也願陛下結人心親賢良以固國本廣儲蓄練將士以壯國氣正名定分裁之以義如桀驚侵軼則提兵問罪使大漠之南不敢有匹馬闌入乃可保百年無虞不然西北力疲東南財竭不能一日安枕矣昨以國用耗乏謀國大臣欲杼一時之急令民納粟者賜冠帶今軍旅稍寧行之如

明紀卷十五

五

故農工商販之徒不校賢愚惟財是授驕親戚誇鄉里長非分之邪心賊污吏罷退爲民欲掩閭黨之恥納粟納草冠帶而歸前以冒貨去職今以輸貨得官何以禁貪殘重名爵況天下統一藏富在民未至大不得已而舉措如此是以空乏啟寇心也章下廷議格不行 楊洪爲鎮朔將軍還鎮宣府從子能信充左右參將子俊爲右都督管三千營洪自以一門父子官極品手握重兵盛滿難居乞休致請調俊等他鎮不許 奸民彭守學復許周忱多徵耗米妄有費用戶部遂請遣御史李鑑等往諸郡稽覈尋以給事中金達言召忱還朝 六月戊辰朔日當食不見 己卯詔貴州各衛修舉屯田 李賢陳車戰火器之利採行之 周忱言臣未任事之先諸郡稅糧無歲不逋自臣

蒞任設法剗弊節省浮費於是歲無逋租更積贏羨凡向之公用所須科取諸民者悉於餘米隨時支給或振貸未還遇赦宥免或未估時直低昂不一緣奉宣宗皇帝并太上皇敕諭許臣便宜行事以此支用不復具聞致守學訐奏戶部遣官追徵實臣出納不謹死有餘罪禮部尚書楊盛言妄費罪乃在忱今估計餘值悉徵於民間至有棄家逃竄者乞將正統以前者免追詔許之召李鑑等還 江淵以天變條上三事一厚結朵顏赤斤諸衛爲東西藩籬一免京軍餘丁以資生業一禁訐告王振餘黨以免枉濫詔從之 時河勢方橫溢分流大清不專向徐呂徐呂益膠淺自臨清以南運道艱阻乃敕山東河南巡撫都御史洪英王暹協力合治務令水歸漕河暹言黃河自洪武二

明紀卷十五

夫

十四年改流從汴梁北五里許由鳳陽入河者爲大黃河其支出徐州以南者爲小黃河以通漕運自正統十三年以來河復故道從黑洋山後徑趨沙灣入海但存小黃河從徐州出岸高水低隨濬隨塞以是徐州之南不得飽水臣自黑洋山東南抵徐州督河南三司疏濬臨清以南請以責英 秋七月戊申普定永寧畢節諸苗復叛梁珪等畱軍討之尋命王來兼巡撫貴州 德勝之捷石亨功不加于謙而得世侯內愧乃疏薦謙子冕詔赴京師辭不允謙言國家多事臣子義不得顧私恩且亨位大將不聞舉一幽隱拔一行伍微賤以裨軍國而獨薦臣子於公義得乎臣於軍功力杜微幸決不敢以子濫功亨復大恚進何文淵吏部尚書佐王直理部事 八月壬申南京地震

帝以兵革稍息頗事游宴周敘請復午朝日接大臣咨諏治道經筵之餘召文學從臣講論政事并詔天下臣民直言時政缺失會葉盛亦以復午朝故事爲請立報可辛巳復午朝時帝虛懷納諫凡六科聯署建請多盛與林聰爲首廷臣議事盛每先發言往復論難與議大臣或不悅曰彼豈少保耶因呼爲葉少保然物論皆推盛才言官猶交章劾周忱請正其罪帝素知忱賢大臣亦多保持之者但令致仕忱性機警錢穀鉅萬一屈指無遺算其治以愛民爲本濟農倉之設雖與民爲期約多不追取每歲徵收畢踰正月中旬輒下檄放糧曰此百姓納與朝廷贖數今還與百姓用之努力種朝廷田秋間又納朝廷稅也諸府餘米數多至不可校忱益務廣大修葺解舍學校先賢

明紀卷十五

七

祠墓橋梁道路及崇飾寺觀贈遺中朝官資藉過客無稍吝惜胥吏漁蠹其中亦不甚訾省以故屢召人言然當時言理財無出忱右者戶部侍郎李敏巡撫應天諸府救無輕易周忱法然自是戶部括所積餘米爲公賦儲備蕭然其後所部大饑道殣相望課逋如故矣民益思忱不已卽生祠處處祀之高穀薦侍講陳文才擢雲南右布政使貴州比歲用兵資饟雲南民困轉輸文令商賈代輸而民倍償其費皆稱便稅課額鈔七十餘萬吏俸所取給典者侵蝕吏或累歲不得俸文悉按治課日羨溢雲南產銀民間用銀貿易視內地三倍隸在官者免役納銀亦三之納者不爲病文曰雖如是得無傷廉乎損之復令減隸額三之一名譽日起給事中張文質劾王暹洪英治水無

績請引塌場水濟徐呂二洪濬潘家渡以北支流殺沙灣水勢且開沙灣浮橋以西河口築閘引水以灌臨清而別命官以責其成詔不允仍命暹英調度時議者謂沙灣以南地高水不得南入運河請引耐牢坡水以灌運而勿使經沙灣別開河以避其衝決之勢或又言引耐牢坡水南去則自此以北枯澀矣甚者言沙灣水湍急石鐵沈下若羽非人力可爲宜設齋醮符咒以禳之帝心甚憂念乃命工部尚書石璞往治而加河神封號

昌平侯楊洪以疾召還九月卒贈穎國公諡武襄洪久居宣府御兵嚴肅士馬精強爲一時邊將冠然未嘗專殺又頗好文學嘗請建學宣府教諸將子弟子傑嗣侯上言臣家一侯三都督蒼頭得官者十六人大懼不足報稱乞停蒼頭楊釗等職許

明紀卷十五

六

之仍令給俸

乙卯禁諸司起復

郭登以疾召還登初至大

同士卒可戰者纔數百馬百餘匹及是馬至萬五千精卒數萬屹然成巨鎮登去大同人思之冬十月己丑免山西被災稅

糧也先數貢馬兵部侍郎李賢謂輦金帛以強寇自弊非策

因陳邊備廢弛狀于謙請下其章厲諸將王竑兼巡撫淮安

揚州廬州三府徐和二州召耿九疇還初廣通王徽燂有勇

力家人段友洪以技術得寵致仕後軍都事于利賓言徽燂有

異相當主天下遂謀亂作僞敕分遣友洪及蒙能陳添仔入苗

中誘諸苗以銀印金幣使發兵攻武岡苗首楊文伯等不敢受

事覺岷王徽燂執友洪都御史李實以聞遣焦敬及中官李琮

徵徽燂入京師王來梁珪復發陽宗王徽燂通謀狀亦徵入廢

爲庶人錮之高牆 十一月羅通協贊京營軍務 浙江右布

政使楊瓚以湖州諸府官田賦重請均之民田賦輕者而嚴禁詭寄之弊詔與孫原貞督之 宣府督饌侍郎劉璉病命戶部

郎李秉往佐之十二月秉發璉侵牟狀擢秉右僉都御史代璉

兼參贊軍務宣府軍民數遭寇牛具悉被掠朝廷遣官市牛萬

五千給屯卒人予直市穀種璉盡以畀京民之出守者一不及

屯卒更停其月餼而徵屯糧甚急秉盡反璉政厚卹之軍卒自

城守外悉得屯作凡使者往來及宦官鎮守供億科斂者皆奏

罷以官錢給費尋上備邊六事言軍以有妻者爲有家月餼一

石無者減其四卽有父母兄弟而無妻槩以無家論非義當一

體增給從之時宣府億萬庫頗充裕秉益召商中鹽納糧料飭

明紀卷十五

九

戎裝市耕牛給軍軍愈感悅 福建賊悉平 庚寅禮部左侍

郎王一璽祭酒蕭鎡兼翰林學士直文淵閣預機務 瓦剌可

汗脫脫不花娶也先姊生子也先欲立爲太子脫脫不花不從

也先亦疑其通中國將謀已遂治兵相攻脫脫不花敗走也先

追殺之執其妻子以其人畜給諸部屬遂乘勝迫脅諸番東及

建州兀良哈西及赤斤蒙古哈密 三年春正月于謙請乘間

大發兵身往討之以雪國恥除邊患帝不許 王來言近因黔

楚用兵暫行鬻爵之例今寇賊稍密惟平越都勻等四衛乏餼

宜召商中鹽罷納米例從之 二月也先來獻捷 乙酉副都

御史劉廣衡錄南京囚 京師久雨雪江淵言漢劉向曰凡雨

陰也雪又雨之陰也仲春少陽用事而寒氣脅之占法謂人君

刑法暴濫之象陛下恩威溥洽未嘗不赦過宥罪竊恐有司奉行無狀冤抑或有未伸且向者下明詔免景泰二年天下租十之三戶部移檄有司但減米麥其折收銀布絲帛者追徵如故則是朝廷自失大信於民怨氣鬱結良由此也帝乃令法司申冤濫詰戶部違詔金濂內慚抵無有給事中李侃等請詰天下有司違詔故濂恐事敗乃言銀布絲帛詔書未載若概減免國用何資戊子諸給事中御史劾濂失信於民爲國斂怨且訐其陰事帝欲宥之侃與御史王允上殿力爭遂下都察院獄三日釋之革太子太保改工部 三月戊戌葉盛爲山西參政督饟宣府程信爲山東參政督饟遼東遼東巡撫寇深奏盜糧一石以上者死又置新斛視舊加大屬信鈎考信立碎之曰奈何納

明紀卷十五

二

人於死深不悅 何文淵言理財非金濂不可復以濂爲戶部尙書濂上疏自理乞骸骨帝慰留之 瀋王佶焯數與州官置酒大會巡撫朱鑑以聞詔諸王非時令壽節不得輒與有司讌飲著爲令 錦衣衛指揮同知畢旺采訪外事衛官漸用事

戊午毛福壽討湖廣巴馬諸處苗克二十餘寨禽賊首吳奉先等百四十人 陳鑑鎮陝西將還王文當代諸御史交章留文乃改命侍郎耿九疇都指揮楊得青等私役操卒九疇劾之詔按治且命諸邊如得青者具劾以聞邊將請增臨洮諸衛戍九疇言邊城士卒非乏將帥能嚴紀律賞罰明信則人人自奮不然徒充食耳乃不增戍邊民春夏出作田秋冬輒徙入塞九疇言邊將所以禦寇衛民今使民避寇失業安用將帥因禁民入

徒有被寇者治守帥罪 林聰言臣職在糾察刑獄妖僧趙才與之疎族百口律不當坐而抄提至京叛人王英兄不知情家口律不當逮而俱配流所雖終見原然其始受害已不堪矣湖廣巡撫蔡錫以劾副使邢端爲所許繫獄經年而端居職如故侍郎劉璉督饌侵隱不爲無罪較沈固周忱乾沒萬計孰爲重輕璉下獄追徵而固忱不問犯人徐南與子中書舍人頤俱坐王振黨當斬乃論南大辟頤止除名皆刑罰之失平者帝是之端下獄璉得釋南亦減死除名 彭時服除至京命供事翰林院不復與閣事 帝之爲郝王也如杭氏生子見濟以爲世子及卽位心欲以見濟代皇太子而難於發皇后亦力以爲不可遲回久之太監王誠舒良爲帝賜陳循高穀百金江淵王一寧

明紀卷十五

五

蕭鎡商輅半之以緘其口廣西土官都指揮使黃玠者思明土知府瑯之庶兄也瑯致仕子鈞襲玠守備潯州令其子襲殺瑯一家支解瑯及鈞而謬爲捕賊以掩其跡瑯僕福童訴其事巡撫侍郎李棠檄右參政曾暈副使劉仁宅按其事玠使人持千金賄於道且擁精兵挾之暈仁宅陽許諾已誘執玠父子下之獄玠寤夏四月遣千戶袁洪走京師上疏勸帝廢太子立己子疏入帝大喜曰萬里外乃有此忠臣亟下廷臣會議且令釋玠罪進階都督諸臣會議者九十一人王文率先承命循及胡濙等皆唯唯李侃林聰朱英以爲不可王直亦有難色與安厲聲曰此事不可已卽以爲不可者勿署名無持兩端循濡筆強直直遂署羣臣皆署於是濙及魏國公徐承宗等言陛下膺天

明命中興邦家統緒之傳宜歸聖子黃琰奏是制曰可禮部具儀擇吉以聞卽日簡置東宮官公孤詹事僚屬悉備吏部右侍郎俞山密疏諫不聽五月甲午廢皇后汪氏立杭氏爲皇后廢皇太子見濬爲沂王立見濟爲太子詔曰天佑下民作之君實遺安於四海父有天下傳之子斯本固於萬年大赦天下令百官朔望朝太子封上皇子見清榮王見淳許王賜親王公主邊鎮文武內外羣臣又加賜循穀淵一密鑑輅各黃金五十兩直歸頓足歎曰此何等大事乃爲一蠻酋所壞吾輩媿死矣朱鑑貽循書言不可且曰陛下於上皇當避位以全大義循大駭棠旣不得竟琰獄鬱鬱累疏謝病歸不攜嶺表一物 復顧與祖伯爵 土木之敗朱勇以大將喪師辱國奪封勇子儀乞葬祭

明紀卷十五

三

亦不許丁酉以立東宮恩命儀襲封成國公減歲祿過半 石璞之治河也濬黑洋山至徐州以通漕而沙灣決口如故命中官黎賢阮洛御史彭誼協治璞等築石隄於沙灣以禦決河開月河二引水以益運河且殺其決勢河流漸微細丙申沙灣堤成加璞太子太保建河神廟二於黑洋山沙灣歲春秋二祭辛丑河南流民復業者計口給食五年 乙巳授顏子裔孫希惠孟子裔孫希文並翰林院五經博士子孫世襲 孫原貞奏析遂安縣地置泰順縣析麗水青田二縣地置雲和宣平景寧三縣建官置戍盜患遂息時又以福建沙縣之永安千戶所爲縣析尤溪縣地益之以廣東南海縣之大良堡爲順德縣析新會縣地益之 六月乙亥罷各省巡撫官入京議事 大雨浹

旬河復決沙灣北岸掣運河之水以東近河地皆沒 潯梧獠亂董興及廣西總兵武毅推委不任事于謙請以翁信陳旺爲廣東西總兵而特遣一大臣督之秋七月乙未左都御史王翱總督兩廣軍務兩廣有總督自翱始翱至推誠撫諭將吏讐服獠人嚮化部內無事 松潘賊首卓勞糾他砦阿兒結等頗爲寇鎮守侍郎羅綺禽斬之 壬寅王一寧卒 八月乙丑振徐克水災 上皇居南宮御用監少監阮浪入侍賜鍍金繡袋及鍍金刀浪以與皇城使王瑤錦衣衛指揮盧忠見之醉瑤酒而竊之以告尙衣監高平平令校尉李善上變言浪傳上皇命以袋刀結瑤謀復位忠爲之徵帝震怒下浪瑤詔獄窮治之浪瑤濱死不及上皇一語忠筮於術者全寅寅以大義折之且曰此

明紀卷十五

三

大凶兆死不足贖忠懼佯狂以冀免商輅及王誠言於帝曰忠病風無足信不宜聽妄言傷大倫帝意少解乃并下忠獄坐以他罪謫廣西立功所告事得不竟而浪與瑤竟磔死 戊辰都御史洪英尙書孫原貞薛希璉等分行天下考察官吏 丁丑振兩畿水災州縣免稅糧 乙酉振南畿河南山東流民 九月庚寅江淵母憂詔奔喪回任初侍講學士倪謙遭喪淵薦爲講官謙遂奪哀至是御史周文言淵引謙正自爲今日地帝以事旣處分不問詔自今羣臣遭喪毋濫保 辛卯以南京地震兩淮大河水決命王文巡視安輯 乙未振兩畿山東山西福建廣西江西遼東被災州縣 南京錦衣衛餘丁華敏言近年以來內官袁琦唐受喜盛王振專權害政致國事傾危望陛下

防微杜漸總攬權綱爲子孫萬世法不然恐禍稔蕭牆曹節侯
覽之害復見於今日臣雖賤陋不勝痛哭流涕謹以虐軍害民
十事爲陛下痛切言之內官家積金銀珠玉壘室兼贏從何而
至非內盜府藏則外賧民膏害一也怙勢矜寵占公侯邸舍興
作工役勞擾軍民害二也家人外親皆市井無藉之子縱橫豪
悍任意作奸納粟補官貴賤淆雜害三也建造佛寺耗費不貲
營一己之私破萬家之產害四也廣置田莊不入賦稅寄戶郡
縣不受徵徭阡陌連亙而民無立錐害五也家人中鹽虛占引
數轉而售人倍支鉅萬壞國家法豪奪商利害六也奏求場房
邀接商旅倚勢賒買恃強不償行賈坐斂莫敢誰何害七也賣
放軍匠名爲伴當俾辦月錢致內府監局營作乏人工役煩重

明紀卷十五

并力不足害八也家人貿置物料所司畏懼以一科十虧官損
民害九也監作所至非法酷刑軍匠塗炭不勝怨酷害十也章
下禮部寢不行 命洪英督有司修築沙灣河隄 閏月癸未
開處州銀場是月福建盜起 禮部侍郎鄒幹考察山西官吏
多所論劾黜布政使侯復以下五十餘人朱鑑請召幹還幹因
極論鑑徇護帝是幹言冬十月召鑑佐院事至京致仕去 陳
循好剛自用高穀與之不相能以王文強悍思引與共政以敵
之乃疏請增閣員循舉其鄉人蕭維楨穀舉文而文得中官助
戊戌命文兼翰林學士直文淵閣預機務 諜報寇牧近邊
丙辰孫鏗石彪協守大同都督同知衛穎僉事楊能張欽協守
宣府備也先穎青之子也 葉盛協贊孫安軍務安方修復獨

石馬營龍門等四城盛興關草萊葺廬舍庀戰具招流移爲行旅置煖鋪請帑金買牛千頭以畀屯卒立社學置義冢療疾扶傷兩歲四城及赤城鵬鶚諸堡次第皆完 召王來等還 十一月己未朔日有食之 王文偕南京九卿議上軍民便宜九事又言徐淮閒饑甚而南京儲蓄有餘請盡發徐淮倉粟振貸而以應輸南京者輸徐淮補其缺皆報可 戊辰方瑛平貴州白石崖諸苗俘斬二千五百人招降四百六十砦 甲戌安輯畿內山東山西逃民復賦役五年 免山東及淮安府徐州水災稅糧 先是江淵言四川巡撫僉都御史李匡不職逮至覈實斥爲民 楊俊言也先旣弑其主併其眾包藏禍心窺伺邊境直須時動耳聞其妻孥輜重去宣府纔數百里我緣邊宿兵

明紀卷十五

三

不下數十萬宜分爲奇正以待誘使來攻正兵列營大同宣府堅壁觀變而出奇兵倍道擣其巢彼必還自救我軍夾攻可以得志疏下廷議于謙等以計非萬全李秉亦曰塞外本諸部牧地非犯邊也掩殺倖功非臣所敢聞乃止 石璞言京師盜賊多出軍伍間有獲者輒云糧餼虧減妻孥飢凍故又聞兩畿山東河南被災窮民多事剽掠不及今拊循恐方來之憂甚於邊患口外守軍夜行晝伏艱苦萬狀今邊疆未靖宜增餼以作士氣乃反減其月糧此實啟盜誤國之端非節財足用之術帝深納其言 戊子錄劉基六世孫祿爲世襲五經博士 初于謙以京兵分隸五軍神機三十三大營各爲教令臨期調撥兵將不相習乃請擇精銳十五萬人分十營各置坐營都督訓練十

二月癸巳始立團營太監阮讓都督楊俊等分統之仍聽謙及石亨太監劉永誠曹吉祥節制以備徵調其餘不屬團營者歸本營訓練以衛京師名曰老家由是京軍之制一變 練綱偕同官應詔陳八事並允行 李秉盡心邊計不恤嫌怨劾都指揮楊文楊鑑都督江福貪縱罪之諭守獨石中官弓勝田獵擾民請徵還又劾總兵官紀廣等罪廣許秉自解帝召秉還改通政蔣琳僉都御史代之言官交章請畱秉乃命練綱及給事中嚴誠往勘卒畱秉時邊民多流移秉廣行招徠復業者奏給月廩軍家爲寇所殺掠無依者官爲養贍或資遣還鄉釐諸弊政所條奏百十章多允行諸部質所掠男婦求易米朝議成丁者予一石幼者半之諸部概乞一石鎮將不可秉曰是輕人重粟也如其言予之自請專擅罪旁以爲識體 丁未進梁珪爵爲侯封毛福壽南甯伯福壽尋更名勝 也先遣使賀明年正旦王直等復請遣使報之下兵部議于謙言臣職司馬知戰而已行人事非所敢聞詔仍毋遣使 免河南及永平被焚秋糧 土魯番漸強侵掠鄰境火州柳城皆爲所併其酋也密力火者遂僭稱王偕其妻及部下頭目各遣使入貢

明紀卷十五

三

